



**Badbaadada
Ilaahay ee
Wanaagsan**

Tusmada

Hordhac.....	1
Erayga Ilaahay iyo Jidka Ilaahay.....	2
Abuuritaanka Ilaahay.....	7
Wannaaga Ilaahay ee Cajiibka ah.....	9
Caddaaladda Ilaahay ee Xaqa ah.....	15
Jacaylka Ilaahay ee Weyn.....	19
Ciise Masiix waa Ilaaha Badbaadiyaheena.....	21
Ciise ayaa Wax Walba inoo Dhammeeyey.....	24
Sida ay u Sahlan Tahay in Ciise La Rumeeyo.....	30
Jannada iyo Naarta.....	35
Allabariyada iyo Qaynuunka.....	37
Waxyiyada iyo Sansaamaha.....	42
Aadan iyo Xaawa.....	45
Qaabiil iyo Haabiil.....	46
Wax ka Barashada Baraska.....	48
Labada Siyood ee uu Ilaahay Dadka u Arko.....	53
Garowsashada Baahideena.....	56
Badbaadada Ilaahay waa u Diyaar Dadka oo Dhan.....	60

1. Hordhac

Akhbaarka badbaadada ee Ilaahay, oo sidoo kale loo yaqaan Injiilka (oo uu micnihiisu yahay warka wanaagsan), waa mid aad u sahlan. Waa kan isaga oo la soo koobay:

Ilaahay ayaa wax kasta si aad u wanaagsan u abuuray, laakiinse dhimashada, iyo silica ayaa ku yimid dembiga daraaddiis. Dembiga (xadgudubka, ama xumaanta) waa innaga oo gaadhi weyney heerka xaqnimada uu Ilaahay inaga doonayo, oo ah inaynu ahaano oo samayno wanaag iyo xaqnimo wax kasta oo aynu qabano, weligeen. Dhammaanteen waynu dembaabney oo waxaynu leennahay dabeecad dembi miidhan ah, oo sina camalladeena (waxa aynu samayno) uguma kasban karno ama uguma shaqaysan karno badbaado. Ilaahay waa quduus, oo micnaheedu yahay inuu Isagu yahay Mid khaas ah, oo eed ka nasahan, oo uu wanaagga ugu weyni u sugnaaday dabeecad ahaan, dhaqan ahaan, ficil ahaan iyo erayo ahaan. Dabeecadda Ilaahay ee dhabta ah ayaa ah jacayl buuxa, laakiinse sidoo kale Isagu si buuxda ayuu u yahay xaq iyo caddaali u yahay, oo si dhib yar isagama idhotiri karo dembiga, waayo caddaaladiisa kaamilka ah ayaa faraysa in innaga la ina xukummo dembiga dartiis.

Maddaama ay jacaylka iyo naxariista Ilaahay aad u weyn yihiin, Wiilka Ilaahay, waa Ciise Masiix e, ayaa Nin noqday, kaddib markii uu ka dhashay bikrad, oo uu ku noolaa nolol quduus ah si uu u qaado xukunka xaq ah ee innaga inagu dhici lahaa. Isagu jidh ahaan oo keliya uma silcin laakiinse dhinac kasta ayuu ka silcay si uu dembiyadeena Dushiisa ugu qaado, oo uu Isugu hibeeyo in loo sadaqeeyo beddelkeena. Ciise wuxuu u dhintay dembiyadeena, oo waa la aasay, dabadeedna saddex maalmood kaddib ayuu soo sarakacay. Maaddaama uu waxan oo dhan innaga inoo sameeyey, haddii aynu dembiyadeena qirano, oo aynu Isaga u nimaadno, innaga oo rumaynayna inuu Isagu dembiyadeena u dhintay, oo uu mar kale soo sarakacay, innagoo aaminayna badbaadadiisa jacaylka ah (oo aan wax kale la inooga baahnayn), markaa dembiyadeena ayaynu saamaxaad u heleynaa. Waxaynu ka badbaadeynaa naarta, oo waxaynu heleynaa nolol abadiyan ah oo ah nabad iyo farxad buuxda jannada dhexdeeda, oo xor ka ah dhimasho, cudur, silic, murugo, xanuun, iyo dembi.

Buuggani wuxuu wax yar kaa tusayaa sida badan ee joogtada ah ee uu Ilaahay Eraygiisa (Baybalka, ama Qorniinka) dhexdiisa ugaga hadlay akhbaarka badbaadadiisa ku saabsan. Si lagaaga caawiyo si aad tusaale tan ugu heshid, buuggani 80% waa aayadaha Qorniinka. Wuxuu ka kooban yahay aayado laga soo xigtey 32 ka mid ah 39-ka buug ee Axdigii Hore, iyo 23 ka mid ah 27 buug ee Axdiga Cusub, oo ah labada qaybood ee uu Baybalka Masiixiyiintu ka kooban yahay. Sidoo kale aayadaha Baybalka laga soo xigtey laguma celcelin.

Axdigii Hore iyo Baybalka Yuhuudda/Cibraaniga (oo loogu yeedho Tanaakh) waa isku mid. Akhbaarka badbaadada ee Ilaahay weligiis isma uu beddelin, oo Axdiga Cusubi maaha Axdigii Hore oo la beddeley, laakiinse wuxuu tusayaa Ilaahay oo kaamilaya badbaadadii uu Isagu ku ballanqaaday Axdigii Hore. Si qodobbadan si fiican laguugu fahansiyo, buuggan dhexdiisa Aayadaha Axdigii Hore laga soo xigtey far buluug ah bay ku qoran yihiin halka kuwa laga soo xigtey Axdiga cusubi ay far cagaar ah ku qoran yihiin.

2. Erayga Ilaahay iyo Jidka Ilaahay

Baybalka wuxuu Ilaahay Laftiisu u muujiyey oo dad badan kuwaas oo iyaguna gacmahooda ku qoray.

- Qorniin kastaa wuxuu ku ahaaday Ruuxa Ilaah oo waxtar buu u leeyahay waxbaridda, iyo canaanashada, iyo hagaajinta, iyo edbinta xagga xaqnimada. (2 Timoteyos 3:16)
- Dadku waxay ku nool yihiin eray walba oo afka RABBIGA ka soo baxa. (Sharciga Ku Noqoshadiisa 8:3)
- Waayo, wixii nebiyadii sii sheegeen weligood kuma ay iman dadka doonistiisa, laakiinse dad Ruuxa Quduuska ahu waday ayaa xagga Ilaah kaga hadlay. (2 Butros 1:21)

Awoodda Ilaahay iyo fahankiisu way ka weyn yihiin maskaxdeena.

- Sayidow, RABBIYOW, bal eeg, samada iyo dhulkaba xooggaaga badan iyo gacantaada fidsan ayaad ku samaysay, oo wax kugu adagna ma jiro. (Yeremyaah 32:17)
- Waan ogahay inaad wax walba kartid, Iyo inaan qasdigaaga innaba la joojin Karin. (Ayuub 42:2)

- Wuxuu sheegaa xiddigaha tiradooda, Oo kulligoodna magacyo buu u bixiyaa. Sayidkeennu waa weyn yahay, wuuna xoog badan yahay, Waxgarashadiisuna waa mid aan la koobi karayn. (Sabuuradii 147:4-5)

Ilaahay wuxuu leeyahay awood uu Eraygiisa ku xafido qarniyadii badnaa ee la soo dhaafay iyo haddaba. Kaasi waa run oo weligiis isma beddelayo.

- RABBIGA erayadiisu waa erayo daahir ah... RABBIYOW waad dhawri doontaa, Oo qarnigan ayaad iyaga ka xannaanayn doontaa weligood. (Sabuuradii 12:6-7)
- Cawsku wuu engegaa, ubaxuna wuu dhacaa, laakiinse erayga Ilaaheennu weligiisba wuu waari doonaa. (Ishacyaah 40:8)
- RABBIYOW, eraygaagu weligiisba Wuxuu taagan yahay samada. (Sabuuradii 119:89)
- RABBIYOW, tan iyo mar hore waxaan soo xusuusnaa xukummadaada, Waanan isqalbi qaboojiyey. (Sabuuradii 119:52)
- Cirka iyo dhulku waa idlaan doonaan, laakiinse ereyadaydu ma idlaan doonaan. (Matayos 24:25)
- Abuur aan baabba'ayn oo ah erayga Ilaah oo nool oo waara. (1 Butros 1:23)
- Haddaba, Sayidow, RABBIYOW, waxaad tahay Ilaah, oo erayadaaduna waa run. (2 Samuu'eel 7:28)
- Eraygaaga dhammaantiisu waa run. (Sabuuradii 119:160)

Xukunka Ilaahay ee mustaqbalkeena ku saabsani waa mid abadiyan ah, oo wuxuu Isagu inaga doonayaa inaynu doorano jidka saxda ah oo aynu Isaga la joogno.

- Waxaa dadka looga dhigay inay mar dhintaan, taas dabadeedna la xukumo. (Cibraaniyada 9:27)
- Eraygaaga dhammaantiisu waa run, Mid kasta oo xukummadaada xaqa ah ka mid ahu wuu sii waaraa weligiisba. (Sabuuradii 119:160)
- Waxbaridda... sarakicidda kuwii dhintay, iyo xukunka weligiis ah. (Cibraaniyada 6:2)
- Kii qalbigiisa isku halleeyaa waa nacas, Laakiinse ku alla kii si caqli ah u socda waa la samatabbin doonaa. (Maahmaahyadii 28:26)

- Ninkii caqli lahu waa cabsadaa, oo sharka wuu ka noqdaa; Laakiinse nacasku waa ciishoodaa, wuuna isku kalsoon yahay. (Maahmaahyadii 14:16)
- Ninkii miyir lahu sharkuu arkaa, wuuna dhuuntaa, Laakiinse garaadlaawayaashu way iska sii maraan, waana la taqsiiraa. (Maahmaahyadii 22:3)
- Kii amarka dhawraa naftiisuu dhawraa, Laakiinse kii jidadkiisa fudaydsadaa wuu dhiman doonaa. (Maahmaahyadii 19:16)
- Kii edbinta diidaa naftiisuu quudhsadaa, Laakiinse kii canaanta maqlaa waxgarashuu helaa. (Maahmaahaydii 15:32)
- **Waayo, nin maxay u taraysaa hadduu dunida oo dhan helo oo uu naftiisa lumiyo? (Markos 8:36)**

Ilaahay waa weyn yahay oo Isaga ayaa awood oo dhammi u sugnaatay, sidaas daraaddeed wuxuu Isagu awoodaa inuu jeexo oo inoo sheego jidka saxda ah ee lagu badbaadayo.

- RABBIGU wax alla wixii uu jeclaystayba wuu ku sameeyey Samada iyo dhulka dhexdooda. (Sabuuradii 135:6)
- Ha ku degdegin inaad hortiisa ka tagtid, wax shar ahna ha ku sii adkaan, waayo, isagu wuxuu sameeyaa wax alla wuxuu ku farxo. Waayo, boqorka hadalkiisu xoog buu leeyahay, oo yaase isaga ku odhan kara, “War maxaad samaynaysaa?” (Wacdiyahii 8:3-4)
- RABBIGA ciidamadu wuxuu ku dhaartay oo yidhi, “Sida xaqiiqada ah waxay noqon doontaa sidii aan ku fikiray, oo taladanuna waxay u hagaagi doontaa sidii aan u qasdiyey... Waayo, RABBIGA ciidamadu waxan wuu u qasdiyey, haddaba bal yaa burin doona? Oo gacantiisiina way soo fidsan tahay, yaa dib u celin doona?” (Ishacyaah 14:24,27)
- Siduu doono ayuu yeelaa... Mana jiro mid gacantiisa joojin karaa ama ku odhan karaa, “Maxaad samaynaysaa?” (Daanyeel 4:35)

Ilaahay wuu ina jecel yahay, laakiinse Isagu ma aqbalayo “daacadnimadeena” ama “rumaysigeena” haddii aynu si khalad ah ula nimaadno.

- Waayo, waxay nebcaadeen aqoonta, Oo RABBIGA ka cabsashadiisana ma ay dooran; Iyagu taladaydii innaba ma ay doonaynin; Oo canaantaydii oo dhanna way quudhsadeen; Haddaba iyagu waxay cuni doonaan midhihii jidkooda... Waayo, garaadlaawayaasha dibunoqoshadooda ayaa iyaga dili doonta, Oo nacasyadana waxaa baabbi'in doonta barwaaqadooda. Laakiinse ku alla kii aniga i maqlaa, ammaan buu u fadhiyi doonaa. (Maahmaahyadii 1:29-33)
- Nacaska jidkiisu waa la qumman yahay isaga, Laakiinse kii caqli lahu taladuu maqlaa. (Maahmaahyadii 12:15)
- Waayo, waxaan markhaati u furayaa inay iyagu Ilaah qiiro weyn u qabaan, laakiinse xagga aqoonta ma aha. (Rooma 10:2)
- Oo weliba in naftu aqoon la'aato ma wanaagsana, Oo kii caghiisu degdegaanna wuu ambadaa. (Maahmaahyadii 19:2)
- Sidaas daraaddeed nacasyo ha ahaanina, laakiinse garta waxa ay doonista Rabbigu tahay. (Efesos 5:17)
- Laakiin Ciise ayaa u jawaabay... “Waad qaldan tihiin oo garan maysaan Qorniinka iyo xoogga Ilaah.” (Matayos 22:29)
- Kii i diida oo aan erayadayda aqbalin, wuxuu haystaa mid xukuma; ereygaan ku hadlay baa xukumi doona isaga maalinta u dambaysa. (Yooxanaa 12:48)

Waa inaynu hubinaa inuu rumaysigeenu qaabilsan yahay Erayga Ilaahay, oo aanu ku salaysnayn waxbarido khaldan, ama caadooyin, iyo dareennadeena.

- Markaasuu wuxuu ku yidhi, “Isayos aad buu wax idiinka sii sheegay, labawejilayaaalow, siday u qoran tahay, Dadkanu bushimahooda ayay igu maamuusaan, Laakiin qalbigoodu waa iga fog yahay. Si aan micne lahayn ayay ii caabudaan, Iyagoo dadka wax ku baraya amarrada dadka”... Markaasuu ku yidhi, Qaynuunkii Ilaah aad baad u diiddaan inaad xeerkiinna xajisaan.” (Markos 7:6-9)

Maaddaama uu Ilaahay aad inoo jecel yahay, wuxuu innaga eraygiisa inagu siyaa digniino badan, wuxuu kaloo eraygiisa inagu baraa jidka quman.

- Erayadaada furniinkoodu wax buu iftiimiyaa, Oo wuxuu waxgarasho siiyaa kuwa garaadka daran. (Sabuuradii 119:130)
- Oo weliba addoonkaagana iyagaa loogu digay, Oo xajintoodana waxaa ku jira abaalgud weyn. (Sabuuradii 19:11)
- Qalbigaaga dhammaantii RABBIGA abbiga ku aamin, Oo waxgarashadaadana ha isku hallayn. Jidadkaaga oo dhan isaga ku qiro, Oo isna waddooyinkaaguu toosin doonaa. Ha isla weynaan; RABBIGA ka cabso; oo sharka ka fogow. (Maahmaahyadii 3:5-7)
- Waayo, wax alla wixii hore loo qorayba waxaa loo qoray waxbarashadeenna, inaynu dulqaadashada iyo gargaarka Qorniinka rajo ku lahaanno. (Rooma 15:4)
- Qorniinka Quduuska ah oo badbaadada kugu garansiin kara rumaysadka Ciise Masiix lagu rumaysto (2 Timoteyos 3:15)

Waxaynu si buuxda isugu hallayn karnaa Ilaahay waayo Isagu weligiis isma beddelo.

- Anigoo RABBIGA ah isma beddelo. (Malaakii 3:6)
- Waa hore ayaad aasaaska dhulka dhigtay, Samooyinkuna waa shuqulkii gacmahaaga. Iyagu way baabbi'i doonaan, adiguse waad sii waari doontaa, Haah, oo kulligood waxay u duugoobi doonaan sida dhar oo kale, Oo waxaad iyaga u beddeli doontaa sida maro oo kale, wayna beddelmi doonaan, Laakiinse adigu isku si uun baad tahay had iyo goorba, Oo sannadahaaguna ma idlaan doonaan. (Sabuuradii 102:25-27)
- Hadiyad kasta oo wanaagsan iyo hibo kasta oo kaamil ah kor bay ka timaadaa iyadoo ka soo degaysa xagga Aabbaha nuurarka isagoo aan lahayn rogrogmad ama hoos laallaabasho. (Yacquub 1:17)

- Ciise Masiix waa isku mid shalay iyo maanta iyo weligiiba. (Cibraaniyada 13:8)
- Ilaah ma aha nin been sheego; Mana aha binu-aadmi qoomameeyo. Ma wuxuu yidhi buusan samaynayn? Ama ma wuxuu ku hadlay buusan yeelayn? (Tirintii 23:19)
- RABBIGU quruumaha taladooda wuu baabbi'iyaa, Oo dadyowga fikirradowda wuu buriyaa. Laakiinse RABBIGA taladiisu weligeedba way adkaataa, Oo fikirrada qalbigiisuna waxay adkaadaan tan iyo ka ab ka ab. (Sabuuradii 33:10-11)

3. Abuuritaanka Ilaahay

Ilaahay mooye ilaah kale ma jiro, oo Ilaahay jiritaankiisa wuxuu si fasiix ah inoogu muujiyey abuuritaankiisa dhexdiisa.

- RABBIGU wuxuu leeyahay, “Anigu waxaan ahay kan ugu horreeyey iyo kan ugu dambeeya, oo aniga mooyaane Ilaah kale ma jiro.” (Ishacyaah 44:6)
- Anigaa Ilaah ah, mid kalena ma jiro, anigaa Ilaah ah, oo mid ila mid ahuna ma jiro. Bilowga waxaan sheegaa ugudambaysta, oo wakhtiga hore waxaan sii sheegaa waxyaalo aan weli la samayn, anigoo leh, Taladaydu way hagaagi doontaa, oo waxaan jeclahay oo dhanna waan wada samayn doonaa. (Ishacyaah 46:9-10)
- Cadhadii Ilaah ayaa samada laga muujiyey iyadoo ka gees ah cibaadodarrada iyo xaqdarrada dadka oo dhan, kuwaasoo runta ku joojiya xaqdarro; maxaa yeelay, wixii Ilaah laga garan karo waa ka dhex muuqataa iyaga, waayo, Ilaah waa u muujiyey iyaga. Tan iyo abuurinta dunida waxyaalihii aan la arki karin ayaa bayaan loo arkaa, iyagoo laga garto waxyaalihii la sameeyey, xataa xooggiisa daa'imiska ah iyo ilaahnimadiisa, si ayan marmarsiinyo u lahaan. (Rooma 1:18-20)
- Laakiinse dadka sharka leh iyo khaa'innadu aad iyo aad bay u sii xumaan doonaan, iyagoo wax khiyaaneeya, lana khiyaaneeyo. (2 Timoteyos 3:13)

- Nacaskaa qalbigiisa iska yidhi, Ilaah ma jiro. Iyagu waa qudhun, oo waxay faleen xumaan karaahiyo ah, Oo mid wanaag falaa ma jiro. (Sabuuradii 53:1)
- Bal kii shar lahu muxuu Ilaah u quudhsadaa? Oo muxuu qalbigiisa uga leeyahay, Adigu waxba i weyddiisan maysid? (Sabuuradii 10:13)
- Iyagu waxay faleen waxay kala xisaabtami doonaan kan diyaarka u ah inuu xukumo kuwa nool iyo kuwa dhintayba. (1 Butros 4:5)
- Waxaa qoran, Anigu waa noolahay, ayaa Rabbigu leeyahay, oo jilib waluba anuu ii sujuudi doonaa, Carrab walubana Ilaah buu qiri doonaa. Sidaasaa midkeen kastaba Ilaah ula xisaabtami doonaa. (Rooma 14:11-12)

Ilaahay wax kasta si wanaagsan ayuu u abuuray, laakiinse dhimasho, cudur, iyo silic ayaa yimid oo weli jira dembiga daraaddiis. Laakiinse rajo ayaa jirta!

- Oo Ilaah wuxuu arkay wax kasta oo uu sameeyey, oo bal eeg, aad bay u wanaagsanaayeen. Waxaana jiray fiid iyo subax, maalintii lixaad. (Bilowgii 1:31)
- Haddaba sida dembigu nin keliya dunida ugu soo galay, dhimashaduna dembiga ugu timid, sidaasaa dhimashadiina u gaadhay dadka oo dhan, waayo, waa la wada dembaabay. (Rooma 5:12)
- Oo waxaan la mid ahay wax qudhmay oo baabba'aya, Iyo sida dhar aboor cunay oo kale. (Ayuub 13:28)
- In uunka qudhiisana laga xorayn doono addoonimada qudhunka ah oo la gelin doono xorriyadda ammaanta carruurta Ilaah. (Rooma 8:21)
- Nimco ha idinla jirto iyo nabad ka timaada Ilaaha Aabbaha ah iyo Rabbigeenna Ciise Masiix, kan naftiisii u bixiyey dembiyadeenna aawadood, si uu inooga bixiyo dunidatan la joogo oo sharka leh. (Galatiya 1:3-4)
- Ilaaha rajadu ha idinka buuxiyo farxad iyo nabad oo dhan, idinkoo rumaysan, si rajadiinnu ugu badato xoogga Ruuxa Quduuskaa. (Rooma 15:13)

4. Wannaaga Ilaahay ee Cajiibka ah

Xaqnimo iyo wanaag oo dhammi Ilaahay bay u sugnaadeen, dhinac kasta iyo weligiisba.

- RABBIGU jidadkiisa oo dhan wuu ku qumman yahay. (Sabuurradii 145:17)
- Isaga xaqdarro kuma jirto. (Sabuurradii 92:15)
- RABBIGU waa xaq... oo innaba xumaan ma samayn doono. (Sefanyaah 3:5)
- RABBIGA Ilaaheenna ah sarraysiiya, Oo isaga ku caabuda buurtiisa quduuska ah, Waayo, RABBIGA Ilaaheenna ahu waa quduus. (Sabuurradii 99:9)
- Ilaah waa nuur yahay, oo isaga innaba gudcur kuma jiro. (1 Yooxanaa 1:5)

Ilaahay wanaag kaas oo kale ayuu innaga inaga rabaa si aynu Isaga jannada ula joogno, laakiinse dhammaanteen waynu ku guuldaraysanay inaynu wanaagsanaano.

- Oo caddaaladna waxaan ka dhigi doonaa xadhig qiyaaseed, xaqnimona waxaan ka dhigi doonaa xadhig miisaan leh. (Ishacyaah 28:17)
- Waa inaad quduus ahaataan, waayo, anigoo ah RABBIGA Ilaahiinna ahuba quduus baan ahay. (Laawiyiintii 19:2)
- Saas aawadeed u samaada sida Aabbihinna jannadu u san yahay. (Matayos 5:48)
- Bal maxaa RABBIGA Ilaahiinna ahu idinka doonayaa, inaad RABBIGA Ilaahiinna ah ka cabsataan, oo aad jidadkiisa oo dhan ku socotaan, oo aad isaga jeclaataan, oo aad RABBIGA Ilaahiinna ah ugu adeegtaan qalbigiinna oo dhan iyo naftiinna oo dhan, oo aad xajisaan RABBIGA amarradiisa iyo qaynuunnadiisa. (Sharciga KuNoqoshadiisa 10:12-13)
- Waxaan ahay Ilaaha Qaadirka ah; hortayda ku soco, oo mid eed la' ahow. (Bilowgii 17:1)

Ilaahay inaguma xukumayo Isaga oo dadka kale ina barbardhigaya ama, “ajarkeena oo ka miisaan weynaadey demiyadeena.”

- Waayo, kuma dhacno inaannu isku tirinno ama isu ekaysiinno kuwa is-ammaana. Laakiin iyaga qudhooda oo isku qiyaasaya qudhooda oo isu ekaysiinaya qudhooda waa garaadlaawayaal. (2 Korintos 10:12)
- RABBIGU wuxuu yidhi, “Ha fiirin soojeedkiisa, ama dhererkiisa, maxaa yeelay, waan diiday isaga. Rabbigu wax uma arko sida dadku wax u arko, waayo, dadku wuxuu fiiriyaa muuqashada dusha, RABBIGUSE qalbiguu fiiriyaa.” (1 Samuu’eel 16:7)
- Haddii nin isu maleeyo inuu weyn yahay isagoo aan waxba ku fillayn, wuu iskhiyaaneeyaa. (Galatiya 6:3)
- Ku alla kii sharciga oo dhan xajiya oo qaynuun keliya ku gafa, kulli wuu ku eedaysan yahay. (Yacquub 2:10)
- Waxyaalihii xaq ahaa ee uu sameeyey oo dhan innaba lama soo xusuusan doono, oo wuxuu ku dhex dhiman doonaa xadgudubkiisii uu xadgudbay, iyo dembigiisii uu dembaabay. (Yexesqeel 18:24)

Ma jiro midkeen buuxiyey waxa uu Ilaahay ina farayo, oo dhammaanteen taas weynu ku guul darraysanay marka la barbardhigo quduusnimadiisa weyn ee abadiyanka ah.

- Ilaah wuxuu samada hoos uga soo fiiriyey binu-aadmiga, Bal inuu arko hadday kuwo wax garanaya oo Ilaah doondoona jiraan. Midkood kastaaba dib buu u noqday, oo dhammaantood waxay wada noqdeen dad nijaas ah, Oo mid wanaag falaa ma jiro, midnaba. (Sabuuradii 53:2-3)
- Waayo, dhulka laguma arag nin xaq ah oo wanaag fala, oo aan dembaabin. (Wacdiyahii 7:20)
- Dadka dhexdiisa laguma arko mid qumman... Kooda ugu wanaagsanu waa sidii qodxan oo kale, kooda ugu wada qummanuna waa sidii yamaarug oo kale. (Miikaah 7:2,4)
- Hubaal dad gun ahu waa xumbo, Oo dad gob ahuna waa been, Markii la miisaamo way kor mari doonaan, Oo iyagu dhammaantood xumbo way ka fudud yihiin. (Sabuuradii 62:9)

- Kala duwanaan ma leh. Maxaa yeelay, dhammaan way wada dembaabeen oo gaadhi waayeen ammaanta Ilaah. (Rooma 3:22-23)
- Waayo, Rabbigu wuxuu leeyahay, Fikirradaydu fikirradiinna ma aha, oo jidadkiinnuna jidadkayga ma aha. Maxaa yeelay, sida samooyinku ay dhulka uga sarreeyaan ayay jidadkaygu jidadkiinna uga sarreeyaan, oo ay fikirradayduna fikirradiinna uga sarreeyaan. (Ishacyaah 55:8-9)
- Waa maxay haddaba? Miyaynu dhaannaa iyaga? Maya, sinaba...Sida qoran: “Mid xaq ahu ma jiro, midnaba... Dhammaantood gees bay u wada leexdeen, waxay wada noqdeen wax aan wax tar lahayn; Mid wanaag falaa ma jiro, midnaba.” (Rooma 3:9-10, 12)

Isla sidii uu Ciise baray, Ilaahay wuxuu inaga rabaa wanaagga ugu sarreeya, maaha ficilladeena oo keliya, laakiinse sidoo kale qalbiga, fikiradeena, erayadeena, ujeedooyinkeena, iyo dabeecadaheena.

- Bal eeg, waxaad uurka ka jeceshahay run. (Sabuuradii 51:6)
- Waad maqasheen in la yidhi, ‘WAA INAANAD SINAYSAN’ Laakiin waxaan idinku leeyahay, Nin walba oo qof dumar ah damac u eegaa, durba qalbigiisuu kaga sinaystay. (Matayos 5:27-28)
- Khaniisiinta iyo dhillayadaba Ilaah waa xukumi doonaa. (Cibraaniyada 13:4)
- Waad maqasheen in kuwii hore lagu yidhi, ‘WAA INAANAD DHIIG QABIN’ ...Laakiin waxaan idinku leeyahay...Mid walba yidhaahda ‘Doqon yahow, wuxuu galabsadaa jahannamada dabka ah.’ (Matayos 5:21-22)
- Ku alla kii walaalkii neceb waa dhiigqabe, oo idinkuna waad og tihiin inaanu dhiigqabena lahayn nolosha weligeed ah oo ku sii jiraysa. (1 Yooxanaa 3:15)
- Waa idiin hoog, culimo iyo Farrisiin yahay, laba-wejiilayaasha ahu, waayo, waxaad u eg tihiin xabaalo la caddeeyey, kuwa dushoodu u eg tahay wax qurxoon, laakiin hoosta waxaa ka buuxa lafo dad dhintay iyo

wasakh oo dhan. Sidaas oo kalena idinku dusha waxaad dadka ugu eg tihiin dad xaq ah, laakiin gudaha waxaa idinka buuxa laba-wejiilenimo iyo dembi. (Matayos 23:27-28)

Dembiga beenaalanimada waxaa ka mid ah nafteena oo aynu been uga sheegno dabeecada Ilaahay sida, “Maaddaama uu Ilaahay jacayl miidhan yahay, Isagu dembiga wuu iska ilaawayaa.”

- Bal eega, idinku waxaad isku hallaysaan erayo been ah oo aan waxba idin tari karin. (Yeremyaah 7:8)
- Waxaa barakaysan ninkii RABBIGA isku halleeya, Oo aan u jeedin kuwa kibirsan ama kuwa beenta ku leexda. (Sabuuradii 40:4)
- Waad wada baabbi'in doontaa kuwa beenta ku hadla, (Sabuuradii 5:6)
- Haddaba dibadda waxaa jooga eeyihii, iyo saaxiriintii, iyo kuwa sinaysta, iyo gacankudhiiglayaashii, iyo kuwa sanamyada caabuda, iyo ku kasta oo been jecel ama sheega. (Muujintii 22:15)
- Laakiinse kuwa fulayaasha ah, iyo kuwa aan rumaysan, iyo kuwa karaahiyada ah, iyo gacankudhiiglayaasha, iyo kuwa sinaysta, iyo saaxiriinta, iyo kuwa sanamyada caabuda, iyo beenlowyada oo dhan waxaa qaybtoodu ku jiri doontaa badda ay dabka iyo baaruuddu ka ololayaan, oo taasuna waa dhimashada labaad. (Muujintii 21:8)

Dembiga sanam-caabudida waxaa ka mid ah inagoo sawir khalad ah Ilaahay ka samaysana oo Isaga u sawirana sida aynu innagu rabno ama jecellahay inuu Isagu noqdo.

- Haddaba innagoo ah Ilaah farcankiis waa inaynaan ka fikirin in Ilaahnimadu ay la mid tahay dahab ama lacag ama dhagax oo lagu xardhay sancada iyo farsamada dadka. (Falimaha Rasuullada 17:29)
- Ilaah wuxuu yidhaahdaa, “Waxaad moodday inaan ahay mid kula mid ah... Laakiinse waan ku canaan doonaa.” (Sabuuradii 50:16,21)
- Sanamkiisii waa been... Iyagu waa wax aan waxtar lahayn iyo shuqul lagu majaanilowdo. (Yeremyaah 51:17-18)

- Sanamyadu waxay sheegeen riyooyin been ah... oo si aan waxtar lahayn ayay ugu qalbi qaboojiyaan. (Sekaryaah 10:2)
- Sanamyo ha u jeesanina, oo hana samaysanina ilaahyo la tumay, waayo, aniga ayaa ah RABBIGA Ilaahiinna ah. (Laawiyiintii 19:4)
- Oo iyagu way diidi jireen qaynuunnadiisii... iyo markhaatifurkiisii uu iyaga ugu marag furay, oo waxay raaceen sanamyo, oo waxay ku dayan jireen quruumihii hareerahooda ku wareegsanaa. (2 Boqorradii 17:15)

Adiga oo haddiyada badbaadada ee Ilaahay aqbala mooyee, xukunka caddaalada ee dembigu waa dhimasho, iyo ka dheeraanshaha boqortooyada Ilaahay.

- Oo ku alla kii caaya aabbihiis ama hooyadiis, sida xaqqiqaada ah waa in la dilaa. (Laawiyiintii 20:9)
- Kii qarsoodi u xanta deriskiisa, kaas waan baabbi'in doonaa... Kii khiyaano ka shaqeeyaase gurigayga ma joogi doono, Kii been ku hadlaana hortayda kuma xoogaysan doono. (Sabuuradii 101:5,7)
- Iyagoo ay ka buuxaan xaqdarrada, iyo sharnimada, iyo damacnimada, iyo xumaanta oo dhammu; waxaa kaloo ay ka buuxaan hinaasada, iyo dilidda, iyo ilaaqda, iyo khiyaanada, iyo camalxumaanta, oo waxay yihiin kuwa wax xun ku faqa, iyo kuwa wax xanta, iyo kuwa Ilaah neceb, iyo kuwa wax caaya, iyo kuwa kibirka badan, iyo kuwa faanka badan, iyo kuwa wax shar ah hindisa, iyo kuwa waalidkood caasiga ku ah, iyo kuwa garaadka la', iyo kuwa axdiga jebiya, iyo kuwa aan kalgacaylka lahayn, iyo kuwa aan naxariista lahayn. Iyagoo garanaya qaynuunka Ilaah in kuwa waxyaalahaas sameeyaa ay dhimasho istaahilaan, ayaanay samayn waxyaalahaas oo keliya ee weliba waxay u bogaan kuwa sameeya. (Rooma 1:29-32)
- Ama miyeydnaan ogayn in kuwa xaqa darani ayan dhaxlayn boqortooyadii Ilaah? Yaan laydin khiyaanayn. Ama dhillayaasha, ama kuwa sanamka caabuda, ama kuwa sinaysta, ama khaanisiinta, ama tuugagga, ama kuwa wax badan damca, ama kuwa sakhraama, ama kuwa

wax caaya, ama kuwa wax dulma, ma dhaxli doonaan boqortooyadii Ilaah. (1 Korintos 6:9-10)

- Waayo, mushahaarada dembigu waa dhimashada, laakiinse hadiyadda Ilaah waa nolosha weligeed ah ee laga helo Rabbigeenna Ciise Masiix. (Rooma 6:23)

Dembigeena innaga ayaa galabsana, oo midkeen kastaa isaga ayaa kaas mas'uuliyaddeeda qaadaya.

- Nafta dembaabtaa way dhiman doontaa. Wiilku ma uu qaadan doono xumaanta aabbaha, aabbuhuna ma uu qaadan doono xumaanta wiilka. Ka xaqa ah xaqnimadiisaa dul saarnaan doonta, oo ka sharka lehna sharnimadiisaa dul saarnaan doonta. (Yexesqeel 18:20)
- Midna yuu odhanin kolkii la jirrabo, Xagga Ilaah baa layga jirrabay. Waayo, Ilaah laguma jirrabo shar, isaguna midna ma jirrabo. Mid kasta waxaa jirraba damaciisa sharka ah isagoo la jiidanayo oo la sasabayo. Dabadeed damacu kolkuu uuraysto wuxuu dhalaa dembi, dembiguna kolkuu weynaado wuxuu keenaa dhimasho. Yaan laydin khiyaanayn, walaalahayga aan jeclahayow. (Yacquub 1:13-16)
- Sow belaayo uma aha kuwa xaqa daran, Iyo masiibo kuwa xumaanta ka shaqeeya? Isagu sow uma jeedin socodkayga oo dhan? Oo sow ma tirinin tallaabooyinkayga oo dhan? (Ayuub 31:3-4)
- RABBIGU wuxuu leeyahay, Miyaa cidi isku qarin kartaa meelo qarsoon oo aanan ka arki karin? Waxaa kaluu RABBIGU leeyahay, Anigu sow kama buuxo cirka iyo dhulkaba? (Yeremyaah 23:24)
- Ilaahow, waad og tahay nacasnimadayda, Oo dembiyadayduna kaama qarsoona. (Sabuuradii 69:5)
- Oo uun aan hortiisa ka muuqani ma jiro, laakiin wax waliba way qaawan yihiin oo bannaan yihiin indhihiisa hortooda, kan aynu ku tirsan nahay. (Cibraaniyada 4:13)

Dembiilenimadeenu Ilaahay bay khalad ku tahay, oo waxaynu u baahannahay badbaado aynu ku hello Ciise Masiix.

- Adiga ayay kugu dembaabaan, (waayo, nin aan dembaabinu ma jiro) oo waad u cadhootay iyaga. (1 Boqorradii 8:46)
- Kan isagoo faraxsan xaqnimo sameeya, iyo kuwa jidadkaaga kugu xusuusta waad la kulantaa. Waad cadhaysnayd, waannuna dembaabnay. Dembiyadaas wakhti dheer baannu ku sii soconnay, haddaba ma nala badbaadin doonaa? (Ishacyaah 64:5)
- Waan naxariis badanahay, ayaa RABBIGU leeyahay oo cadhadaydana weligay sii haysan mayo. Waxaad keliya ood aqoonsataa xumaantaada, inaad RABBIGA Ilaahaaga ah ku xadgudubtay. (Yeremyaah 3:12-13)
- Oo maalintaas waxaad odhan doontaa, RABBIYOW, waan kuu mahadnaqayaa, waayo, in kastoo aad ii cadhaysnayd, cadhadaadii way iga rogmatay oo waad i qalbi qaboojisay. Bal eega, Ilaah waa badbaadadayda! Waan isku hallayn doonaa, mana baqi doono. (Ishacyaah 12:1-2)

5. Caddaaladda Ilaahay ee Xaqa ah

Ilaahay aad buu u jacayl iyo naxariis badan yahay, laakiinse naxariistiisa iyo caddaaladdiisu way isu dheeli tiran yihiin oo waa inuu dembiga ciqaabo, sidaas darteed waxaynu innagu u baahannahay badbaado.

- Kolkaasaa RABBIGU hortiisa maray oo naadiyey isagoo leh, “Waxaan ahay RABBIGA, RABBIGA, oo ah Ilaah raxmad iyo roonaan badan, oo cadho u gaabiya, oo naxariis iyo run badan, oo kumankun u naxariista, oo xumaanta iyo xadgudubka iyo dembiga dhaafa, laakiin aan sinaba u caddayn in kan dembiga galay aanu eed lahayn.” (Baxniintii 34:6-7)
- RABBIGU cadho waa u gaabiyaa, oo waa naxariis badan yahay, oo xumaanta iyo xadgudubka wuu dhaafaa, oo sinaba uma caddeeyo in kan dembiga galay aanu eed lahayn. (Tirintii 14:18)

- RABBIGU cadho wuu u gaabiya, waana xoog badan yahay, oo kii gardaran sinaba eedlaawe ugu haysan maayo. (Naaxuum 1:3)
- jidadkiisa oo dhammu waa caddaalad, Isagu waa Ilaah aamin ah, oo aan xumaan lahayn, Isagu waa xaq, waana caaddil. (Sharciga KuNoqoshadiisa 32:4)
- Waxaad RABBIGA ku daaliseen erayadiinna, oo weliba waxaad tidhaahdaan, War sidee baannu isaga u daalinnay? Waad daalisaan markaad tidhaahdaan, Ku alla kii shar falaaba waa ku wanaagsan yahay RABBIGA hortiisa, oo isagu wuu ku farxaa. Amase markaad tidhaahdaan, Meeh Ilaahii caddaaladdu? (Malaakii 2:17)
- Haddaynu nidhaahno, Dembi ma lihin, nafsaddeenna ayaynu khiyaanaynaa, oo runtuna inaguma jirto. (1 Yooxanaa 1:8)
- Oo weliba waxaad istidhaahdaa, Anigu xaq ma qabo. Sida xaqiiqada ah cadhadiisu way iga noqotay. Bal ogow, anigu waan kula muddici doonaaye, maxaa yeelay, waxaad tidhaahdaa, Anigu ma aan dembaabin. (Yeremyaah 2:35)

Ilaahay waa naxariis and wuxuu inoo diyaariyey badbaado, laakiinse waa in Isaga laga cabsada waayo xukunkiisa adag daraaddiis.

- Bal hadda fiiri roonaanta iyo adkaanta Ilaah. (Rooma 11:22)
- Gacanta Ilaahayagu waxay saaran tahay intii isaga doondoonta oo dhan, wayna u wanaagsan tahay; laakiinse xooggiisa iyo cadhadiisu waxay ka gees yihiin in alla intii isaga ka tagta oo dhan. (Cesraa 8:22)
- Jidhkaygu wuxuu la gariiraa cabsidaada, Oo waxaan ka baqaa xukummadaada. (Sabuuradii 119:120)
- Ha ka baqina kuwa jidhka dila, laakiin aan karin inay nafta dilaan, waxaadse ka baqdaan kan jahannamada ku hallayn kara nafta iyo jidhkaba. (Matayos 10:28)
- RABBIYOW, bal ayaan kaa cabsan doonin oo aan magacaaga ammaani doonin? Waayo, adiga keligaa ayaa quduus ah. (Muujintii 15:4)

- Waxaa aqoonta ugu horreeya RABBIGA ka cabsashadiisa; Laakiinse nacasyadu waxay quudhsadaan xigmadda iyo edbinta. (Maahmaahyadii 1:7)
- Kii RABBIGA ka cabsada waxaa loo kaxeeyaa xagga nolosha. (Maahmaahyadii 19:23)
- Waxaa dembiga lagu kafaaraggudaa naxariis iyo run, Oo dadkuna waxay sharka kaga fogaadaan RABBIGA ka cabsashadiisa. (Maahmaahyadii 16:6)

Ciise Masiix Laftiisa ayaa ah Xaakinka, hore ayuuna innaga inoogu sheegay sida uu wax u xukumayo.

- maxaa yeelay, wuxuu dhigay maalin uu dunida si xaq ah ugu xukumi doono. Falimaha Rasuullada 17:31)
- Waayo, isagu waa imanayaa, Oo wuxuu u imanayaa inuu dunida xukumo. Isagu wuxuu dunida ku xukumi doonaa xaqnimo, Dadyowgana runtiisa. (Sabuuradii 96:13)
- Isagoo ku wacdiyaya warka wanaagsan ee nabadda xagga Ciise Masiix.... kanu waa kii Ilaah ka dhigay xaakinka kuwa nool iyo kuwa dhintayba. (Falimaha Rasuullada 10:36,42)
- Laakiinse Ilaah baa xaakin ah, Isagu mid buu dejiyaa, ku kalena wuu sarraysiyaa. (Sabuuradii 75:7)
- Shuqulka sharka ah xukunkiisa dhaqso looma oofiyo, oo sidaas daraaddeed binu-aadmiga qalbigiisu inuu shar sameeyo aad buu u damcaa. (Wacdiyahii 8:11)
- RABBIGU wuxuu leeyahay... “erayada aan kugu amro inaad kula hadashid erayna ha ka reebin. Mindhaa waxaa suurtowda inay ku maqlaan oo mid kastaaba ka soo noqdo jidkiisa sharka ah, inaan anigu ka soo noqdo masiibadii aan u qasdiyey inaan iyaga ku sameeyo sharka falimahooda aawadiis.” (Yeremyaah 26:2-3)
- RABBIGU wuxuu leeyahay... “Sidaas daraaddeed anigu midkiin kastaba waxaan u xukumi doonaa siday jidadkiisu ahaayeen. Haddaba soo noqda, oo xadgudubyadiinnii oo dhan ka soo noqda, si ayan xumaantu halligaaddiinnii u noqon. (Yexesqeel 18:30)
- Kii isaga rumaystaa ma xukumna, laakiinse kii aan isaga rumaysan, hore ayaa loo xukumay, maxaa yeelay,

wuxuusan rumaysan magaca Wiilka Ilaah oo keliya oo dhashay. (Yooxanaa 3:18)

Ilaahay, jacaylkiisa daraaddiis, wuxuu inoo furay jid aynu kaga baxsano dhimashada abadiyanka ah oo wuu inoo digey, oo haddii aynu cadaawayaashiisa noqono, markaa innaga ayaa taas doorannay, ee Isagu taas inooma kasbin.

- Ilaah wuxuu inoo yahay Ilaaha samatabbixinta, IIAAHA Sayidka ah ayaa iska leh dhimashada kabixiddeeda. Laakiinse Ilaah wuxuu wax ku dhufan doonaa madaxa cadaawayaashiisa... kan xadgudubyadiisa ku sii socdaba. (Sabuuradii 68:20-21)
- Sidee baynu u baxsan doonaa haddaynu dayacno badbaadintan weyn? (Cibraaniyada 2:3)
- Qudhayadu waxaannu naftayada ku haysannay xukunka dhimashada, inaannan naftayada isku hallayn, laakiin inaannu Ilaah isku hallayno kan sara kiciya kuwii dhintay. Isagaa naga samatabbixiyey dhimasho saas u weyn. (2 Korintos 1:9-10)
- RABBIYOW, tukashadayda maqal, oo baryootankayga dhegta u dhig, Oo daacadnimadaada iyo xaqnimadaada iigu jawaab. Anoo addoonkaaga ah xukun ha i gelin, Waayo, inta nool oo dhan ma jiro nin hortaada lagu caddayn doonaa inuu xaq yahay. (Sabuuradii 143:1-2)
- RABBIYOW, Ilaahayow, igu xukun sida ay xaqnimadaadu tahay, Oo yaanay igu rayrayn. (Sabuuradii 35:24)
- Ilaahow, magacaaga igu badbaadi, Oo xooggaaga iigu garsoor. (Sabuuradii 54:1)
- RABBIGA magiciisu waa noobiyad xoog leh, Kii xaq ahu iyaduu ku cararaa, meel sarena wuu ku nabad galaa. (Maahmaahyadii 18:10)
- Laakiin engegnaantaada iyo toobadla'aanta qalbigaaga aawadood waxaad cadho u urursanaysaa maalinta cadhada iyo muuqashada xukunka xaq ah oo Ilaah, kan nin kasta u siin doona sida shuqulkiisu ahaa, (Rooma 2:5-6)

6. Jacaylka Ilaahay ee Weyn

Ilaahay aad iyo aad buu u jacayl, naxariis, raxmad, dulqaad iyo saamaxaad badan yahay, si maskaxdeena ka weyn.

- Oo ka aan jeclaynina Ilaah ma yaqaan; waayo, Ilaah waa jacayl. (1 Yooxanaa 4:8)
- RABBIGU waa raxmad badan yahay, waana nimco miidhan, Cadho wuu u gaabiyaa, waana naxariis badan yahay. (Sabuuradii 103:8)
- RABBIYOW, naxariistaadu waa badan tahay. (Sabuuradii 119:156)
- Ilaaha naxariista hodanka ka ah. (Efesos 2:4)
- Laakiinse adigu waxaad tahay Ilaah wax cafiya, waxaanad tahay nimco miidhan, oo waxaa kaa buuxda raxmad, cadho waad u gaabisaa, naxariisna hodan baad ka tahay. (Nexemyaah 9:17)
- Oo aad dadkiisa ogeysiisid badbaadada Ee dembidhaafkooda ah, Ee laga hela naxariista weyn ee Ilaaheenna, Tan qorraxda soo baxda xagga sare inaga soo booqan doonta, (Luukos 1:77–78)
- Isagu sii ma cadhaysnaado weligiis, maxaa yeelay, naxariistuu ku farxaa. (Miikaah 7:18)
- Waan ogaa inaad tahay Ilaah nimco miidhan ah, oo raxmadu ka buuxdo, oo cadhada u gaabiya, oo naxariis badan, iyo inaad sharka ka noqotid. (Yoonis 4:2)

Ilaahay wuu ina jecel yahay oo wuxuu doonayaa inaynu Isaga xidhiidh la lahaano, laakiinse taasi waxay keliyoo suurtooggal noqonaysaa marka aynu adeecno qaynuunka Ilaahay ee ah inaynu Ciise rumayno.

- Saaxiibbaday baad tihiin haddaad yeeshaan waxaan idinku amro. (Yooxanaa 15:14)
- Laakiin in alla intii aqbashay, wuxuu siiyey amar ay carruurtii Ilaah ku noqdaan, kuwaasu waa kuwii magiciisa rumaystay. (Yooxanaa 1:12)

- Oo waxay noqon doontaa meeshii laga yidhi iyaga, “Dadkayga ma ahidin,” waxaa laga odhan doonaa, “Idinku waxaad tihiiin wiilashii Ilaaha nool.” (Hoosheeca 1:10)
- Wixii aannu aragnay oo aannu maqalnay ayaannu idiinka warramaynaa, si aad idinkuna noo soo wehelisaan; oo wehelnimadeennu waa mid la jirta Aabbaha iyo Wiilkiisa Ciise Masiix ah. (1 Yooxanaa 1:3)

Ilaahay wuxuu ku qanacsan yahay caddaaladdiisa (kafaaragudka) dembiyadeena ka geeska ah, oo wuxuu kaloo jacaylkiisa ku tusay markii Isagu dusha ku qaaday dhimashadii aynu ku xukunnayn.

- Ilaah baa Wiilkiisa keliya oo dhashay dunida u soo diray si aynu ugu noolaanno isaga, oo taasaa jacaylka Ilaah laynoogu muujiyey. Oo taas jacayl baa ku jira, mana aha inaynu Ilaah jeclayn, laakiinse isagaa ina jeclaaday, oo wuxuu Wiilkiisa u soo diray si uu kafaaraggudka dembiyadeenna u noqdo. (1 Yooxanaa 4:9–10)
- Laakiinse Masiixu waa inoo dhintay intaynu weli dembilayaal ahayn, oo sidaasuu Ilaah jacaylkiisii inoogu muujiyey. (Rooma 5:8)
- Waxaan idin ogeysiinayaa injiilka aan idinku wacdiyey...
- Masiixu wuxuu u dhintay dembiyadeenna sida Qorniinku leeyahay, waa la aasay isaga, oo maalintii saddexaad ayaa la sara kiciyey... Markaasuu wuxuu mar keliya u muuqday kuwo ka badan shan boqol oo walaalo ah. (1 Korintos 15:1,3-4,6)
- Ilaah intuu dunida jacayl u qabay ayuu siiyey Wiilkiisa keliya oo dhashay in mid kastoo isaga rumaystaa uusan lumin laakiinse uu lahaado noloshu weligeed ah. (Yooxanaa 3:16)

Ciise Masiix noloshiisa lagama qaadan karin, laakiise Isaga ayaa si xor ah Isu bixiyey jacaylka uu inoo qabo dartiis.

- Ninna igama qaado, laakiin anaa iska bixiya. (Yooxanaa 10:18)
- Taasaynu jacaylka ku garanaynaa, waayo, isagu naftiisuu u bixiyey aawadeen. (1 Yooxanaa 3:16)

- Waxaan ku noolahay rumaysadka xagga Wiilka Ilaah, kan i jeclaaday oo naftiisa u bixiyey daraadday. (Galatiya 2:20)
- Jacayl ku socda siduu Masiixuba idiin jeclaa, oo uu nafsaddiisii inoogu bixiyey inuu Ilaah u ahaado qurbaan iyo allabari oo uu ahaado caraf udgoon. (Efesos 5:2)

7. Ciise Masiix waa Ilaaha Badbaadiyaheena

Ciise Masiix wuxuu yahay, oo weligiis ahaa, oo ahaan doonaa Wiilka Ilaahay, Kaas oo jacayl dartiis, hoos u soo degey oo Nin noqday si uu innaga inoogu quudiyo badbaado (kibista nolosha).

- Gacmahaygaan ku xambaaray, laakiinse iyagu ma ay ogayn inaan bogsiiyey iyaga. Waxaan iyaga ku soo jiiday dad xadhkihiis iyo jacayl xidhmihis... oo waxaan hortooda dhigay cunto. (Hoosheeca 11:3–4)
- Rabbiguna wuxuu ku yidhi... “Anigu waan ogahay caloolxumadooda, oo waxaan u imid inaan ka samatabbixiyo.” (Baxniintii 3:7–8)
- Markaasaa Ciise u jawaabay oo ku yidhi... “Anigu waxaan ahay kibista nool ee samada ka soo degtay. Haddii qof uun kibistan cuno, weligiis wuu noolaan doonaa.” (Yooxanaa 6:43,51)
- Bilowgii waxaa jiray Ereyga, Ereyguna wuxuu la jiray Ilaah, Ereyguna wuxuu ahaa Ilaah... Ereyguna jidh buu noqday, oo waa ina dhex joogay. (Yooxanaa 1:1,14)
- Kuwa awowayaasha leh, oo xagga jidhka Masiixu ka yimid iyaga, kan wax walba ka sarreeya oo ah Ilaah ammaanta leh weligiis. (Rooma 9:5)
- Ilaahay jidh baa lagu muujiyey. (1 Timoteyos 3:16)
- Buuxnaanta Ilaahnimada oo dhammu waa ku jirtaa isagoo jidh leh. (Kolosay 2:9)
- Markii raxmaddii Ilaaha Badbaadiyeheenna ah iyo jacaylkii uu dadka u qabay muuqdeen, (Tiitos 3:4)
- Kuwa helay iimaan qaali ah oo keenna la mid ah, oo ku helay xaqnimada Ilaaheenna iyo Badbaadiyeheenna Ciise Masiix. (2 Butros 1:1)

- Ilaah waa boqorkayga tan iyo waa hore, Isagoo badbaadin ka dhex samaynaya dhulka. (Sabuuradii 74:12)

Ciise wuxuu ina tusay inuu Isagu Ilaahay yahay markii uu qaatay magaca Ilaahay ee ah “WAAN AHAY.” Wuxuu kaloo taas muran la’aan qiray Toomas.

- Ilaah wuxuu Muuse ku yidhi, ANIGU WAXAAN AHAY KAN AHAY; oo weliba wuxuu ku yidhi, Waxaad ku odhan doontaa reer binu Israa’iil, WAAN AHAY baa ii soo kiin diray. (Baxniintii 3:14)
- Sidaa aawadeed Yuhuuddii waxay ku yidhaahdeen, Weli konton sannadood ma aadan gaadhin, oo Ibraahim ma aragtay? Ciise wuxuu ku yidhi, Runtii, runtii, waxaan idinku leeyahay, Intaan Ibraahim jirin ANAA AH. Markaasay dhagaxyo u gurteen inay ku tuuraan. (Yooxanaa 8:57–59)
- Markaasuu Toomas ku yidhi, Fartaada keen oo arag gacmahayga, oo gacantaadana keen oo geli dhinacayga, oo ha rumaysad la’aanin laakiin rumayso. Toomas ayaa u jawaabay oo ku yidhi, Rabbigay iyo Ilaahayow. (Yooxanaa 20:27–29)

Ciise Qof ayuu noqday si uu Isagu u qaadi karo ciqaabtii dembigeenaa. Isagu dhexdhexaadiye ayuu inoo noqday waayo Isagu waa Ilaahay iyo Nin labadaba.

- Haddaba waxaa isaga u ekayd inuu wax walba ugu ekaado walaalihiis, inuu wadaad sare oo naxariis iyo aamin badan leh u noqdo xagga waxyaalaha Ilaah, si uu cadhotir ugu noqdo dembiyada dadka. (Cibraaniyada 2:17)
- Waayo, waxaa jira Ilaah keliya iyo dhexdhexaadiye keliya oo u dhexeeya Ilaah iyo dadka, waana ninka Ciise Masiix ah, oo naftiisii dadka oo dhan furashadooda u bixiyey, oo wakhtigiisii qummanaa loo markhaati furay. (1 Timoteyos 2:5–6)

Ciise, Ilaaheena caddaaliga ah, oo jacayl daraaddiis qaaday dembigeenii si aynu Isaga ula noolaan karno, ayaa Badbaadiyaha keliya iyo jidka keliya ee badbaadada.

- Aniga hortay Ilaah lama samayn, dabadayna innaba ma jiri doono. Aniga, aniga qudhayda ayaa RABBIGA ah, oo

aniga mooyaane Badbaadiye kale ma jiro. (Ishacyaah 43:10–11)

- Aniga mooyaane Ilaah kale ma jiro. Waxaan ahay Ilaah xaq iyo Badbaadiye ah, oo aniga mooyaane mid kale ma jiro. (Ishacyaah 45:21)
- RABBIGA uun ayaa xaqnimo iyo xoogba leh. Isagaa loo iman doonaa, oo kuwii isaga u cadhaysnaa oo dhammuna way wada ceeboobi doonaan. (Ishacyaah 45:24)
- Dhammaantiin ogaada... in magaca Ciise Masiix... ninkan isagoo bogsaday halkan hortiinna ah ku taagan yahay... Mid kale badbaadada lagama helo, maxaa yeelay, ma jiro magac kale samada hoosteeda oo dadka dhexdooda loo bixiyey oo waajib inoo ah inaynu ku badbaadno. (Falimaha Rasuullada 4:10,12)
- Laakiin waxyaalahan waxaa loo qoray inaad rumaysataan inuu Ciise yahay Masiixa, Wiilka Ilaah, iyo inaad nolosha ku lahaataan magiciisa idinkoo rumaysanaya. (Yooxanaa 20:31)

Ciise, jacaylkiisa dartiis, wuxuu inaga caawinayaa inaynu iska ilaalino jidadka khaladka ah, Isaga oo inoo sheegay inuu Isagu yahay Badbaadiyaha keliya iyo jidka keliya ee badbaadada loo marayo.

- Ciise wuxuu isaga ku yidhi, “Anigu waxaan ahay jidka iyo runta iyo nolosha. Ninna Aabbaha uma yimaado, xaggayguu ku yimaado maahee.” (Yooxanaa 14:6)
- Ciise ayaa mar kale ku yidhi... “Waxaan ahay illinka, haddii qof uun xaggayga ka soo galo, wuu badbaadi doonaa.” (Yooxanaa 10:7,9)
- Ciise ayaa mar kale la hadlay iyaga, oo wuxuu ku yidhi, “Anigu waxaan ahay nuurka dunida. Kii i soo raacaa, gudcurka kuma socon doono, wuxuuse lahaan doonaa nuurka nolosha. (Yooxanaa 8:12)
- Haddaba waxaan idinku idhi, Dembiyadiinna waad ku dhiman doontaan, waayo, haddaydnan rumaysan inaan isagii ahay, dembiyadiinna ayaad ku dhiman doontaan. (Yooxanaa 8:24)

Amarka Ilaahay dartiis ayaa mas naxaas laga sameeyey meel laga taagey. Tani waxay calaamad u ahayd Ciise oo dembiyadeena ku qaadaya iskutallaabta dusheeda, oo si aynu u badbaadno, waa inaynu Isaga kor u eegnaa (aaminaa).

- Oo Muuse baa abeeso naxaas ah sameeyey oo wuxuu kor saaray tiirkii calanka, oo haddii abeeso qof qaniinto oo qofku soo eego abeesadii naxaasta ahayd wuu noolaan jiray. (Tirintii 21:9)
- Markaasaa Ciise u jawaabay... “Sidii Muuse abeesadii kor ugu qaaday cidlada, sidaasoo kale Wiilka Aadanaha waa in kor loo qaado, in mid kastoo isaga rumaystaa uu lahaado nolosha weligeed ah.” (Yooxanaa 3:10,14–15)
- Waayo, tanu waa doonistii Aabbahay in mid kasta oo Wiilka arka oo rumaysta uu nolosha weligeed ah lahaado, aniguna maalinta u dambaysa waan soo sara kicin doonaa. (Yooxanaa 6:40)
- Dhulka darafyadiisa oo dhammow, i soo eega, oo kulligiin badbaada, waayo, anigaa Ilaah ah, oo aniga mooyaane mid kale ma jiro. (Ishacyaah 45:22)
- Oo isagu dembiyadeennii wuxuu ku qaaday jidhkiisii geedka saarnaa, si innagoo dembi kala dhimannay aynu xaqnimo ugu noolaanno. Waxaad ku bogsateen xariijimihii karbaashiddiisii. (1 Butros 2:24)

8. Ciise ayaa Wax Walba inoo Dhammeeyey

Ciise ayaa shaqadii badbaadada oo dhan inoo dhammeeyey, oo ma jirto wax aynu taas ku dari karno ama ku soo kordhin karno.

- Oo isagu waa dhalaalka ammaantiisa iyo u-ekaanta ahaantiisa, oo wax walba wuxuu ku hayaa erayga xooggiisa, oo goortuu daahirinta dadka dembiyadooda sameeyey dabadeed ayuu wuxuu fadhiistay Weynaha xagga sare midigiisa. (Cibraaniyada 1:3)
- Isaga mar keliya ayaa la muujiyey inuu dembiga ku baabbi'iyay allabariigiisa. (Cibraaniyada 9:26)
- Waxaan ogahay in wax kasta oo Ilaah sameeyaaba ay weligood sii raagayaan. Waxba laguma dari karo, waxbana

lagama dhimi karo. Oo Ilaah wuxuu saas u yeelay in dadku ka cabsado. (Wacdiyahii 3:14)

- Markaasaan fiiriyey shuqulladii ay gacmahaygu sameeyeen oo dhan, iyo hawshii aan ku hawshooday oo dhan, oo bal eeg, dhammaantood waxay ahaayeen wax aan waxba tarayn iyo dabagalka dabaysha oo kale, oo innaba faa'iido laguma arag inta qorraxda ka hoosaysa. (Wacdiyahii 2:11)
- Waad ii yeedhi lahayd, oo anna waan kuu jawaabi lahaa; Oo adna waxaa damac kaa geli lahaa shuqulkii gacmahaaga. (Ayuub 14:15)
- Anigu weligay iyo weligayba waxaan isku hallaynayaa naxariista Ilaah. Weligayba waan kugu mahadnaqayaa, maxaa yeelay, adigu waad samaysay. (Sabuuradii 52:8-9)
- Cadowga naga caawi, Waayo, binu-aadmiga caawimaaddiisu waxtar ma leh. Ilaah caawimaaddiisa ayaannu wax xoog leh ku samayn doonaa. (Sabuuradii 108:12-13)
- RABBIYOW, Ilaahayow, i caawi, Oo igu badbaadi si naxariistaada waafaqsan, Si ay u ogaadaan in tanu tahay shaqadii gacaantaada, Iyo inaad taas samaysay, RABBIYOW.” (Sabuuradii 109:26-27)
- RABBIYOW, waxaad tahay Ilaahay. Waan ku sarraysiin doonaa, oo magacaagana waan ammaani doonaa, waayo, waxaad samaysay waxyaalo yaab. (Ishacyaah 25:1)
- Kii aan shaqayn illowse rumaysta kan xaq ka dhiga kuwa aan cibaadada lahayn, rumaysadkiisa waxaa lagu tiriyaa xaqnimo. Sida Daa'uudna uga sheegayo barakadii ninkii Ilaah xaq u tiriyey shuqullo la'aantood. (Rooma 4:5-6)

Shaqadii Ciise qabtay keligeed ayaa ku filan inay inaga badbaadiso dembiyada oo dhan, kuwii hore, kuwa hadda, iyo kuwa mustaqbalka.

- RABBIYOW, nabad baad na siin doontaa, oo weliba shuqulladayadii oo dhan baad noo wada samaysay. (Ishacyaah 26:12)

- Waxaan u qayshanayaa Ilaaha ugu sarreeya, Oo ah Ilaaha wax kasta ii sameeya. (Sabuuradii 57:2)
- Ilaah jidkiisu waa qumman yahay... Oo Isagu wuxuu gaashaan u yahay kuwa isku halleeya oo dhan. Bal yaa Ilaah ah, RABBIGA mooyaane? Oo bal yaa dhagax weyn ah, Ilaahayaga mooyaane? Ilaah waa qalcaddayda xoogga badan; Oo isagu wuxuu hoggaamiyaa kuwa jidkiisa ku qumman. (2 Samuu'eel 22:31-33)
- Laakiin isagu kolkuu allabari keliya mar keliya dembiyo u bixiyey ayuu fadhiistay midigta Ilaah... Maxaa yeelay, bixin keliya ayuu kaamil kaga dhigay weligood kuwa quduus laga dhigay. (Cibraaniyada 10:12,14)
- Dhammaan buu u badbaadin karaa kuwa Ilaah ugu dhowaada isaga. (Cibraaniyada 7:25)
- Hubaalkan oo kale ayaannu Masiix ku leennahay xaggii Ilaah; ma aha inaannu isku filan nahay inaannu wax ka tashanno xagga qudhayada, laakiin iskufillaantayadu waa xagga Ilaah. (2 Korintos 3:4-5)
- Waa laydin buuxiyey idinkoo ku jira Isaga. (Kolosay 2:10)
- Runtii, runtii, waxaan idinku leeyahay, Kii i rumaystaa, wuxuu leeyahay nolosha weligeed ah. (Yooxanaa 6:47)

Si kaamil ah oo bilaash ah ayaa Badbaadada la inoo siiyey shaqadiisa iyo wanaaggiisa (xaqnimadiisa) daraaddeed.

- Iyagu allabariga mahadnaqidda ha bixiyeen, Oo shuqulladiisa gabay ha ku sheegeen. (Sabuuradii 107:22)
- Sayidka ILAAHA ah ayaan ka dhigtay magangalkayga, Inaan ka sheekeeyo shuqulladaada oo dhan. (Sabuuradii 73:28)
- Bal kaalaya, oo arka shuqullada Ilaah, Xagga binu-aadmiga wuxuu ku sameeyey waa cabsi badan yihiin. (Sabuuradii 66:5)
- Waayo, RABBIYOW, waxaad igaga farxisay shuqulkaagii, Oo shuqullada gacmahaagana waan ku guulaysan doonaa. (Sabuuradii 92:4)

- Dadka intooda badanu waxay naadiyaan raxmaddooda, Laakiinse nin aamin ah bal yaa heli kara? (Maahmaahyadii 20:6)
- Adigaan isku kaa halleeyaa... SAYIDKAYGA baad tahay, Oo innaba wanaag ma haysto la'aantaa. (Sabuuradii 16:1-2)
- RABBIGA Ilaahooda ahu dadkiisuu maalintaa badbaadin doonaa... Barwaaqadiisu badanaa oo quruxdiisu weynaan badanaa! (Sekaryaah 9:16-17)
- Wanaaggaagu weynaan badanaa, kan aad u kaydisay kuwa kaa cabsada, Oo weliba aad binu-aadmiga hortiisa ugu diyaarisay kuwa isku kaa halleeya. (Sabuuradii 31:19)
- RABBIGA ku mahadnaqa, waayo, isagu waa wanaagsan yahay. (Sabuuradii 136:1)
- Oo RABBIGU wuxuu leeyahay, “dadkayguna wanaaggaygay ka dhergi doonaan.” (Yeremyaah 31:14)
- Ciise wuu diray isagoo ku leh, “Gurigaaga ku noqo oo dadka ogeysii waxa weyn oo Ilaah kuu sameeyey.” (Luukos 8:38-39)

Innagu xaq ma nihin, laakiinse xaqnimo ayaynu heli karnaa haddii aynu oggolaano xaqnimada Ilaahay.

- Masiixuba mar buu u xanuunsaday dembiyada. Isagoo xaq ah ayuu u xanuunsaday kuwa aan xaq ahayn aawadood inuu inoo keeno Ilaah. (1 Butros 3:18)
- Iyagoo aan ogayn xaqnimada Ilaah oo doonaya inay taagaan tooda, ayayan hoos gelin Ilaah xaqnimadiisa. Waayo, Masiixu wuxuu mid kasta oo rumaysta u yahay sharciga dhammaadkiisii xagga xaqnimada. (Rooma 10:3-4)
- Laakiin horta doondoona boqortooyadii Ilaah iyo xaqnimadiisa, oo waxaas oo dhan waa laydinku dari doonaa. (Matayos 6:33)
- Oo boqor ayuu ahaan doonaa, wuuna liibaani doonaa, oo wuxuu dhulka ku samayn doonaa caddaalad iyo xaqnimo... Oo magiciisa lagu magacaabi doonona waa “RABBIGA Xaqnimadayada ah.” (Yeremyaah 23:5-6)

- RABBIGU wuxuu soo saaray xaqnimadeennii, ina keena oo aynu Siyoon ka caddayno shuqulka RABBIGA Ilaaheenna ah. (Yeremyaah 51:10)
- Afkaygu wuxuu maalinta oo dhan ka sheekayn doonaa xaqnimadaada, iyo badbaadintaada... Waxaan la imanayaa Sayidka ILAAHA ah shuqulladiisa xoogga leh, Oo waxaan ka hadli doonaa xaqnimadaada, taasoo ah taada oo keliya. (Sabuuradii 71:15-16)

Badbaadadu waa hadiyad bilaash ah, oo gebi ahaanba lagu kasbado nimcada iyo naxariista Ilaahay, oo tan kuma helo waayo waynu shaqaysanay ama camallo aynu samaynay daraaddood.

- Kuwa hela badnaanta nimcada iyo hadiyadda xaqnimada, noloshay ku dhex talin doonaan kii kale aawadiis kaas oo ah Ciise Masiix. (Rooma 5:17)
- Ilaah baa mahad leh hadiyaddiisa aan la sheegi karin aawadeed. (2 Korintos 9:15)
- Waayo, idinku waxaad ku badbaaddeen nimco xagga rumaysadka, mana aha wax xaggiinna ka yimid, laakiinse waa hadiyadda Ilaah, mana aha xagga shuqullada, si aan ninna ugu faanin. (Efesos 2:8-9)
- Taagnaada, oo bal arka badbaadada uu Rabbigu maanta idiin samayn doono... RABBIGU aawadiin buu u diriri doonaa, oo idinku waa inaad iska aamusnaataan. (Baxniintii 14:13-14)
- Isaga, sida ay hodantinimada nimcadiisu tahay, waxaynu dhiiggiisa ku leennahay madaxfurasho ah dembidhaafkeenna. (Efesos 1:7)
- Laakiinse haddii nimco lagu doortay, de haddaba ma aha mar dambe xagga shuqullada, haddii kalese nimcadu mar dambe nimco ma aha. (Rooma 11:6)
- Inaguma uu badbaadin shuqullada xaqnimada oo aynu samaynay, laakiinse naxariistiisa aawadeed wuxuu inagu badbaadiyey. (Tiitos 3:5)

Mid ka mid ah eedaysanayaashii Masiixa agtiisa lagu qodbay oo markii hore Isaga caayayey, ayaa nimcada Ilaahay darteed qalbigiisii wakhti yar ka hor intuusan kaasi dhiman, oo Ciise ayaa tusay inuu kaasi badbaadey oo isaga Jannada ugu bishaareeyey.

- Markaasaa waxaa iskutallaabo lagu la qodbay laba tuug, mid midigta, midna bidixda... Tuugaggii iskutallaabaha lagu la qodbayna sidaas oo kale ayay u caayeen. (Matayos 27:38,44)
- Xumaanfalayaashii deldelnaa midkood ayaa caayay isagoo leh, “Miyaanad ahayn Masiixa? Annaga iyo qudhaadaba badbaadi.” Laakiin kii kale ayaa jawaabay oo canaantay isagoo leh, “Miyaanad xataa Ilaah ka baqin, waayo, isku xukun baad tihiin? Waayo, innaga waa inoo xaq, maxaa yeelay, waxaynu helnay abaalkii wixii aynu falnay, ninkanuse wax aan jid ahayn ma uu falin.” Markaasuu ku yidhi, “Ciisow, i xusuuso goortaad boqortooyadaada ku timaado.” Wuxuu ku yidhi, “Runtii waxaan kugu leeyahay, Maanta Firdooska ayaad igula jiri doontaa.” (Luukos 23:39-43)

Haddalladiisii uu yidhi markii uu iskutallaabta ku qodbanaa, ayuu Ciise ku tusay in, Jacaylkiisa daraaddiis, uu Isagu shaqadii badbaadada si buuxda inoogu dhammeeyey.

- Ciise... ayaa yidhi, “Waa dhammaatay,” markaasuu madaxa foororshay oo ruuxii bixiyey. (Yooxanaa 19:30)
- Masiix wuxuu inaga furtay inkaartii sharciga, isagoo inkaar inoo noqday. (Galatiya 13:3)
- Sayidow, naftayda dacwooyinkeeda waad ii qaadday, waadna i madaxfuratay. (Baroorashadii Yeremyaah 3:58)

Sarakiciddii Ciise waxay tusaysaa inuu Isagu ku noolaa nolol quduus ah, oo loo aqbalay inuu noqdo beddelkii qaaday xukunkii dembiga.

- Kii loo bixiyey xadgudubkeenna aawadiis oo loo sara kiciyey inuu xaq inaga dhigo. (Rooma 4:25)
- Oo haddii aan Masiixa la sara kicin, rumaysadkiinnu waa khasaare, oo weli dembiyadiinna ayaad ku jirtaan...

Laakiinse haatan Masiixa ayaa kuwii dhintay laga sara kiciyey. (1 Korintos 15:17,20)

- Ammaanu ha u ahaato Ilaaha ah Aabbaha Rabbigeenna Ciise Masiix. Naxariistiisa badan aawadeed ayuu mar kale ina dhalay inaynu rajo nool ku helno sarakiciddii Ciise Masiix ka soo sara kacay kuwii dhintay. (1 Butros 1:3)
- Ciise ayaa ku yidhi, “Anigu waxaan ahay sarakicidda iyo nolosha. Kii i rumaystaa, in kastoo uu dhinto, wuu noolaan doonaa.” (Yooxanaa 11:25)

9. Sida ay u Sahlan Tahay in Ciise La Rumeeyo

Badbaadada Ilaahay waxaa kaloo loogu yeedhaa warka wanaagsan waayo maaha inaynu kaas u qalmi karno, laakiinse, waxaynu u baahannahay oo keliya inaynu Ciise aamino.

- Laakiin waxaan ka baqayaa in maankiinna laga halleeyo lillaahinimada iyo daahirnimada xagga Masiix, sidii abeesadii xeeladdeedii Xaawa ugu khiyaanaysay oo kale. (2 Korintos 11:3)
- Sidaas aawadeed waxay ku yidhaahdeen, “Maxaannu yeelnaa si aannu shuqullada Ilaah u samayno?” Ciise ayaa u jawaabay oo ku yidhi, “Kanu waa shuqulkii Ilaah inaad rumaysataan kii uu soo diray.” (Yooxanaa 6:28-29)
- Mid kastoo isaga rumaystaa wuxuu magiciisa ku helaa dembidhaafka. (Falimaha Rasuullada 10:43)
- Iska jira yaan ninna idinku dhicin faylosofiyadiisa iyo khiyaanadiisa bilaashka ah xagga caadooyinka dadka iyo waxyaalaha dunida ugu horreeya oo aan ka iman xagga Masiixa. (Kolosay 2:8)
- Innaga oo weliba garanaynaa inaan nin xaq ku noqon shuqullada sharciga, rumaysadka uu Ciise Masiix ku rumaystay mooyaane, xataa innagu waan rumaysannay Ciise Masiix inaynu xaq ku noqonno rumaysadka Masiix ee ayan ahayn shuqullada sharciga, maxaa yeelay, shuqullada sharciga ninna xaq kuma noqon doono. (Galatiya 2:16)

- Dadka dhulka oo dhammow, RABBIGA u gabya, Oo badbaadintiisana muujiya maalin ka maalin. (1 Taariikhdii 16:23)

Dad baa isku daya inay kharibaan sahlanaanta warka wanaagsan iyaga oo kaas ku daraya waxyaalo ay tahay in la sameeyo si loo badbaado.

- Eray kasta oo Ilaah waa daahir; Oo isagu wuxuu gaashaan u yahay kuwa isaga aaminsan. Erayadiisa waxba ha ku darin, Waaba intaas oo uu ku canaantaa, oo lagu ogaadaa inaad beenaaleh tahay. (Maahmaahyadii 30:5-6)
- Oo bal yaad ka baqday oo aad ka cabsatay, oo aad saas darteed been u sheegtay oo aadan ii soo xusuusan, ama aadan innaba xaalkan qalbigaaga u gelin?... Waxaan sheegi doonaa xaqnimadaada iyo shuqulladaada, iyaguse waxba kuuma tari doonaan... Laakiinse kii isku kay halleeyaa dalkuu hantiyi doonaa oo wuxuu dhaxli doonaa buurtayda quduuska ah. (Ishacyaah 57:11-13)
- Sidaas daraaddeed ayaan kala firdhin doonaa sida dabaysha cidladu ay xaab baabba'aya u kala firdhiso oo kale. RABBIGU wuxuu leeyahay, Tanu waa qaybtaada oo ah intii aan kuu qiyaasay, maxaa yeelay, waad i illowday, oo been baad isku hallaysay. Sidaas daraaddeed darfaha dharkaagaan xaydi doonaa ilaa wejigaaga si ay ceebtaadu u muuqato aawadeed. (Yeremyaah 13:24-26)
- Waxaan la yaabsanahay dhaqsiiyaha aad uga dhaqaaqaysaan kii nimcada Masiixa idiinku yeedhay, oo aad u leexanaysaan injiil kale, oo aan ahayn mid kale, laakiin waxaa jira kuwo idin dhibaya, oo doonaya inay injiilka Masiixa qalloociyaan. Laakiinse annaga ha noqoto ama malaa'ig samada ka timid ha noqotee, kii idinku wacdiya injiil aan ahayn kaannu idinku wacdinay, ha inkaarnaado. (Galatiya 1:6-8)

Dembiga sanamcaabudida waxaa kaloo soo gelaya nafteena oo aynu caabudno (qof ahaan) innaga oo qiime sare siinayna camalladeena halkii aynu Ilaahay (Abuuraha) ka qiimayn lahayn.

- Oo weliba dalkooda waxaa ka buuxa sanamyoo, oo waxay caabudaan shuqulkii gacmahooda, iyo wixii ay farahoodu sameeyeen. (Ishacyaah 2:8)
- Oo anna waxaan kala hadli doonaa xukummadayda ku saabsan xumaantooda oo dhan, waayo, way iga tageen oo ilaahyo kale ayay foomo u shideen, wayna u sujuudeen shuqulladii ay gacmahoodu sameeyeen. (Yeremyaah 1:6)
- Maxaa yeelay, runtii Ilaah bay been ku beddeleen, oo waxay caabudeen oo u adeegeen ummadda intay caabudi lahaayeen kan uumay oo weligiis ammaanta leh. Aamiin. (Rooma 1:25)
- Waxay isku halleeyaan waxaan waxba ahayn, oo been bay ku hadlaan. (Ishacyaah 59:4)
- Kuwa waxyaalaha beenta ah oo aan micne lahayn ku fikiraa Waxay ka tagaan naxariistoodii... Badbaado waxaa leh RABBIGA. (Yoonis 2:8-9)

Maaha inaynu “faano,” innaga oo u malaynayna inaynu wax ku soo kordhin karno, laakiise taas beddelkeeda aynu “is gudno,” si aynu isaga jarno isku hallayn kasta oo aynu jidhkeena (nafteena) ku qabno.

- Kuwa doonaya inay dadka istusaan inay wanaagsan yihiin xagga jidhka waxay keliyahoo idinku qasbaan in laydin gudo... inay jidhkiinna ku faanaan. Laakiinse yaanay noqon inaan wax kale ku faano iskutallaabta Rabbigeenna Ciise Masiix mooyaane...Waayo, gudniinta iyo buuryoqabnimada midna waxba ma tarto, laakiinse waxaa wax tara abuurid cusub. (Galatiya 6:12-15)
- Sidaas daraaddeed haddii qof Masiix ku jiro waa abuur cusub. (2 Korintos 5:17)
- Waayo, innagu waxaynu nahay kuwa gudan oo Ruuxa Ilaah ku caabuda, oo Ciise Masiix ku faana, oo aan jidhkana ku kalsoonayn. (Filiboy 3:3)
- Haddaba sida jidhka loo gudo isaga jara xumaanta qalbigiinna, oo mar dambe ha sii madax adkaanina. (Sharciga KuNoqoshadiisa 10:16)

Ilaahay wuxuu fuulidda faraska u isticmaalaa inuu tusaale ka bixiyo jidhka (nafta) oo la talo saarto, oo wuxuu ka digayaa cawaaqibka ka dhasha haddii sidaas la sameeyo.

- Waxaa iska hoogay kuwa Masar caawimaad ugu dhaadhaca, oo fardo ku kalsoonaada...Laakiinse aan Kan Quduuska ah ee reer binu Israa'iil fiirin, oo aan RABBIGANA innaba doondooin... Haddaba bal ogaada in Masriyiintu ay binu-aadmi yihiin, oo ayan Ilaah ahayn, iyo in fardahoodu ay jiidh yihiin, oo ayan ruux ahayn. (Ishacyaah 31:1,3)
- Waa ruuxa kan wax nooleeyaa, jidhkuse waxba ma taro. (Yooxanaa 6:63)
- RABBIGA ciidammadu wuxuu leeyahay, 'Itaal kuma aha, xoogna kuma aha, laakiinse waxay ku tahay ruuxayga.' (Sekaryaah 4:6)
- Faras waa waxmatare in badbaado laysugu halleeyo, Oo weliba ninnaba kuma samatabbixiyo xooggiisa badan. Bal eega, RABBIGA ishiisu waxay la jirtaa kuwa isaga ka cabsada, Waana kuwa naxariistiisa rajeyya, Inuu naftooda dhimashada ka samatabbixiyo, Iyo inuu wakhtiga abaartaa sii nooleeyo iyaga. (Sabuurradii 33:17-19)
- Iyagu khiyaano way xajisanayaan, wayna diidaan inay soo noqdaan. Waan dhegaystay oo waan maqlay, laakiinse si qumman uma ay hadlin. Oo midkoodna xumaantiisii kama tobadkeeno, isagoo leh, "Bal maxaan sameeyey? Mid kastaaba wuxuu u leexdaa jidkiisii sida faras dagaal ku yaacaya." (Yeremyaah 8:5-6)
- Isagu kuma farxo xoogga faraska, Oo kuma reyreeyo lugaha dadka. RABBIGU wuxuu ku reyreeyaa kuwa isaga ka cabsada, Iyo kuwa naxariistiisa rajada ka qaba. (Sabuurradii 147:10-11)
- Xumaantiinnii waad ku dhacdeen.U soo noqda RABBIGA Ilaahiinna ah, Erayo ula taga Rabbiga, oo waxaad ku tidhaahdaan, "Xumaanta oo dhan naga fogee oo si wanaagsan noo aqbal... Annagu fardo fuuli mayno, oo weliba sancada gacmahayagana mar dambe ku odhan mayno, "Waxaad tihiin ilaahayo." (Hoosheeca 14:1-3)

- RABBIGA waan u gabyi doonaa, waayo, ammaan buu ku guulaystay; Faraskii iyo kii fuushanaaba wuxuu ku tuuray badda. RABBIGU waa xooggayga iyo gabaygayga, Oo Isagu wuxuu noqday badbaadadayda. Kanu waa Ilaahay, oo anigu waan ammaani doonaa isaga. (Baxniintii 15:1-2)
- Qaar waxay isku halleeyaan gaadhifardoodyo, qaarna waxay isku halleeyaan fardo, Laakiinse innagu waxaynu xusuusanaynaa magaca RABBIGA Ilaaheenna ah. (Sabuuradii 20:7)

Qiime ayaynu innagu leennahay waayo Ilaahay ayaa ina abuuray oo ina jecel, laakiinse wuxuu Ilaahay neceb yahay isla weynaanta iyo nafteena oo aynu isku hallayno. Waa inaynu Ilaahay oo keliya isku hallaynaa.

- Kibirka, iyo madaxweynaanta, iyo jidka sharka, Iyo afka qalloocan ayaan anigu necbahay. (Maahmaahyadii 8:13)
- Waxa qalbiga dadka gudhiisa ka soo baxa fikirrada shar leh, iyo galmada xaaraanta ah, iyo tuuganimada, iyo dilidda, iyo damacnimada, iyo sharka, iyo khiyaanada, iyo camal xumaanta, iyo il xun, iyo cayda, iyo kibirka, iyo nacasnimada. Waxyaalahan shar leh oo dhammu gudahay ka soo baxaan oo ninka nijaaseeyaan. (Markos 7:21-23)
- Nin kibirkiisu hoos buu u dejin doonaa, Laakiinse kii is-hoosaysiiyaa sharaf buu heli doonaa. (Maahmaahyadii 29:23)
- Kibirku wuxuu hor socdaa baabba', Oo madaxweynaanuna waxay hor socotaa dhicid. (Maahmaahyadii 16:18)
- Waxaa jirta waddo dadka la hagaagsan, Laakiinse dhammaadkeedu waa waddooyinka dhimashada. (Maahmaahyadii 14:12)
- Bal eega, kan madaxa weynaaday naftiisii way kibirtay, oo ma toosna, laakiinse kii xaq ahu rumaysadkiisa buu ku noolaan doonaa. (Xabaquuq 2:4)
- Ilaaha badbaadadayadow, Waxyaalo cabsi badan ayaad xaqnimo noogu jawaabi doontaa, Waxaad tahay kalsoonida kuwa dunida darfaheeda oo dhan, Iyo kuwa badda fogba. (Sabuuradii 65:5)

Kani waa masaal uu Ciise baray oo ku saabsan laba qof oo mid isku halleeyey wixii uu sameeyey, ka kalena uu isku halleeyey naxariista Ilaahay.

- Masaalkan ayuu kula hadlay qaar ismoodayay inay xaq yihiin oo kuwa kale quudhsaday. Laba nin ayaa tegey inay macbudka ku tukadaan; mid Farrisi buu ahaa, kan kalena cashuurqaade. Farrisigii intuu istaagay ayuu waxyaalahan isugu tukaday, “Ilaahow, waxaan kuugu mahadnaqayaa inaan ahayn sida nimanka kale oo wax dulma, iyo kuwa xaq daran, iyo dhillayaasha, ama xataa sida cashuurqaadahan. Toddobaadkiiba laba kol ayaan soomaa, waxaan haysta oo dhanna toban meelood ayaan meel ka bixiyaa.” Laakiin cashuurqaadihii meel fog ayuu ka istaagay, ma uuna doonaynin inuu indhihiisa cirka u qaado, laakiin laabtiisa ayuu garaacay isagoo leh, “Ilaahow, ii naxariiso anigoo dembi leh.” Waxaan idinku leeyahay, Kan iyo kii kale, kan baa gurigiisa tegey isagoo la caddeeyey inuu xaq yahay; waayo, mid kasta oo isa sarraysiia waa la hoosaysiin doonaa, oo kii is-hoosaysiiyana waa la sarraysiin doonaa. (Luukos 18:8-14)

Waa inaynu doonista Ilaahay samaynaa, oo aaminaa shaqada la kaamilay ee Ciise, halkii aynu iskaga hallayn lahayn “camalladeena wanwanaagsan.”

- Ma aha qof kasta oo igu yidhaahda, ‘Rabbow, Rabbow,’ kuwa boqortooyadii jannada gelayaa, laakiin kii sameeya doonista Aabbahayga jannada ku jira, kaasaa gelaya. Maalintaas qaar badan baa igu odhan doona, ‘Rabbow, Rabbow, miyaannan magacaaga wax ku sii sheegin, oo miyaannan magacaaga jinniyo ku saarin, oo miyaannan magacaaga wax badan oo xoog leh ku samayn?’ Markaasaan ku odhan doonaa, ‘Weligay idinma aqoon, iga taga, dembifalayaalow.’ (Matayos 7:21-23)

10. Jannada iyo Naarta

Naartu waa meesha ay Shaydaanka (ibliiska) iyo dhammaan kuwa jidka Ilaahay diidaa ku dambayn doonaan.

- Feejignaada... waayo, cadowgiinna Ibliska ahu sida libaax ciyaya ayuu u wareegaa oo u doondoona cid uu liqo. (1 Butros 5:8)
- Oo Ibliskii iyaga khiyaanayn jirayna waxaa lagu dhax tuuray baddii dabka iyo baaruudda ahayd, halkaas oo ay ku jiraan bahalkii iyo nebigii beenta ahaa, oo iyaga waxaa la cadaabi doonaa habeen iyo maalinba weligood iyo weligoodba. (Muujintii 20:10)
- Waxaa dhacay inuu miskiinkii dhintay, oo malaa'igahu waxay u qaadeen laabtii Ibraahim. Ninkii hodanka ahaana waa dhintay, waana la aasay. Intuu Haadees ku jiray ayuu indhihiisa kor u qaaday isagoo aad u silcaya; wuxuuna meel fog ka arkay Ibraahim, iyo Laasaros oo laabtiisa ku tiirsan. Markaasuu qayliyey oo yidhi, 'Aabbe Ibraahimow, ii naxariiso, oo Laasaros ii soo dir inuu fartiisa caaraddeeda biyo ku tiinbiyo oo carrabkayga ku qabowjiyo, waayo, anigu ololkan ayaan ku silcayaa.' (Luukos 16:22-24)
- Oo qiiqa caddibaaddooda kor buu u baxayaa weligiis iyo weligiis, oo nasasho heli maayaan habeen iyo maalin toona. (Muujintii 14:11)

Haddii aynu aqballo badbaadada Ilaahay, Isaga ayaynu nabad iyo farxad abadiyan ah kula hoogeynaa jannada (adduunka cusub).

- RABBIYOW, adigaan isku kaa halleeyaa... xaqnimadaada igu samatabbixi oo i nabad geli. (Sabuuradii 71:1-2)
- Oo dhimashadana weligeed buu liqay, Sayidka Rabbiga ahuna weji kastaba ilmada wuu ka tirtiri doonaa, oo ceebta dadkiisana dhulka oo dhan wuu ka qaadi doonaa, waayo, sidaasuu Rabbigu ku hadlay. (Ishacyaah 25:8)
- Oo isna indhahooda ilmo kastuu ka tirtiri doonaa, oo dhimashona mar dambe ma jiri doonto, oo mar dambena ma jiri doonaan murug iyo oohin iyo xanuun toona, waayo, waxyaalihii hore way dhammaadeen. (Muujintii 21:4)
- Oo mar dambe habeen ma jiri doono, oo iyana uma baahnaan doonaan laambad iftiinkeed iyo iftiinka qorraxda toona; waayo, waxaa iyaga iftiimin doona Rabbiga Ilaaha ah. (Muujintii 22:5)

- Waayo, bal eega, waxaan abuuri doonaa samooyin cuscusub iyo dhul cusub, oo waxyaalihii horena lama soo xusuusan doono, oo innaba maanka sooma ay geli doonaan. Laakiinse farxa oo weligiinba waxa aan abuuru ku reyreeya. (Ishacyaah 65:17-18)
- Oo taambuuggayguna iyaguu la jiri doonaa, oo Ilaahoodaan ahaan doonaa, oo iyaguna dadkaygay ahaan doonaan. (Yexesqeel 37:27)
- Oo waxaan arkay samo cusub iyo dhul cusub; waayo, samadii hore iyo dhulkii hore way dhammaadeen... Markaasaan maqlay cod weyn oo carshiga ka yeedhaya oo leh, “Bal eeg, rugta Ilaah waxay la jirtaa dadka, oo isna wuxuu la degganaan doonaa iyaga, oo iyana waxay ahaan doonaan dadkiisa, oo Ilaah qudhiisuna wuxuu la jiri doonaa iyaga, oo wuxuu ahaan doonaa Ilaahood.” (Muujintii 21:1,3)
- Laakiinse sidii uu inoo ballanqaaday, waxaynu sugaynaa samooyin cusub iyo dhul cusub oo xaqnimo dhex deggan tahay. (2 Butros 3:13)
- Isku salaama dhunkasho jacayl ah. Oo intiinna Masiixa kuwiisa ah oo dhan nabaddu ha u ahaato. (1 Butros 5:14)
- Haddaba Rabbiga nabadda qudhiisu mar walba si kasta nabad ha idiin siiyo. (2 Tesaloniika 3:16)

11. Allabariyada iyo Qaynuunka

Ilaahay ma doonayo allabariyo. Allabariyadu waxay xusuus u ahaayeen xumaanta iyo khatarnimada dembiga, iyo baahida imaanshaha Badbaadiye.

- Allabari iyo qurbaan kuma aad faraxsanid... Qurbaan la gubo iyo qurbaanka dembiga midna ima aad weyddiisan. (Sabuuradii 40:6)
- RABBIGU wuxuu leeyahay, “Allabaryadiinna tirada badanu bal maxay ii yihiin?... kuma farxo dhiigga dibida, iyo ka baraarka iyo ka orgida toona... Mar dambe ha ii keenina qurbaanno aan waxtar lahayn... Uma adkaysan karo dembi. (Ishacyaah 1:11,13)

- Waayo, waxaan doonayaa naxariis ee ma aha allabari, oo aqoonta Ilaahna waan ka jeclahay qurbaanno la gubo. (Hoosheeca 6:6)
- Ilaaha sameeyey dunida iyo waxyaalaha ku jira oo dhanba, oo ah Rabbiga samada iyo dhulka, ma deggana macbudo gacmo lagu sameeyey, gacmo dadna looguma adeego sidii isagoo wax u baahan, maxaa yeelay, dhammaan isagaa siiya nolosha iyo neefta iyo wax walbaba. (Falimaha Rasuullada 17:24-25)

Baahida allabari iin la'aan ahi wuxuu tusayaa baahideena Badbaadiyaha quduuska ah waa Ciise Masiix e, oo ah allabariga keliya ee la aqbalayo.

- Laakiinse waa inaydaan bixin wax alla wixii iin leh, waayo, waxaas laydinka aqbali maayo. Oo ku alla kii Rabbiga u bixiya allabari qurbaanno nabaadiino ah... waa inuu ka bixiyaa mid innaba iin lahayn. (Laawiyiintii 22:20-21)
- Wankiinnu waa inuu ahaadaa mid aan iin lahayn. (Bixintii 12:5)
- Waxaad og tihiin inaan dabiicaddiinnii bilaashka ahayd oo aad awoyayaashiin ka dhaxasheen laydinkaga soo furan waxyaalaha baabba'aya oo ah sida lacagta iyo dahabka laakiinse waxaa laydinku soo furtay dhiiggii qaaliga ahaa oo Masiix oo ah sidii wan yar oo aan wax ceeb ah iyo iin toona lahayn. (1 Butros 1:18-19)
- Yooxanaa wuxuu arkay Ciise oo ku soo socda, oo wuxuu yidhi, Bal eega Wanka Ilaah ee dembiga dunida qaadaya." (Yooxanaa 1:29)
- Oo idinku waad og tihiin in isagu u muuqday inuu dembiyadeenna inaga qaado, oo isagu dembi ma leh. (1 Yooxanaa 3:5)
- Waayo, ma aynu lihin wadaad sare oo aan itaaldarradeenna ka nixi karin, laakiin waxaynu leennahay mid si walba loo jirrabay sideenna oo kale, oo aan weliba dembi lahayn. Haddaba aynu carshiga nimcada dhiirraan ugu soo dhowaanno si aynu naxariis u qaadanno oo aynu u helno nimco ina caawisa wakhtiga baahida. (Cibraaniyada 4:15-16)

Ilaahay wuxuu doonayaa toobadkeen (qirashada dembiga iyo aaminaada Ciise), ee ma doonayo allabariyo (camallo aynu u malayno inay fiican yihiin).

- “Bal maxaan RABBIGA hortiisa la imaadaa? Oo sidee baan Ilaaha sare ugu hor sujuudaa? Ma qurbaanno la gubo baan Rabbiga hortiisa la imaadaa?... RABBIGU ma ku farxaa kumanyaal wanan, amase toban kun oo webi oo saliid ah? Xadgudubkayga aawadiis miyaan curadkayga u bixiyaa? Dembigii naftaydase ma midhaha jidhkaygaan u bixiyaa?” Nin yahow, Isagu wuxuu ku tusay waxa wanaagsan. (Miikaah 6:6-8)
- Waayo, adigu kuma faraxdid allabari, haddii kalese waan bixin lahaa, Qurbaan gubanna kuma cajebiyo. Allabaryada Ilaah waa ruux is-hoosaysiintiisa, Ilaahow, adigu quudhsan maysid qalbi hoosaysan oo qoomamaysan. (Sabuuradii 51:16-17)
- Bixiya allabaryadii xaqnimada, Oo RABBIGA isku halleeya. (Sabuuradii 4:5)
- Aasaaska ka-toobadkeenidda shuqulladii dhintay, iyo iimaanka xagga Ilaah. (Cibraaniyada 6:1)
- U warramaya... si ay Ilaah ugu toobadkeenaan oo ay u aaminaan Rabbigeenna Ciise Masiix. (Falimaha Rasuullada 20:21)

Qaynuunka Axdigii Hore looma bixin in lagu badbaado, laakiinse waxaa loo bixiyey inuu inaga caawiyo inaynu garowsano baahida aynu u qabno Badbaadiye.

- Waayo, qaynuunku waa laambad, amarkuna waa iftiin, Oo canaanashada edbintuna waa jidkii nolosha. (Maahmaahyadii 6:23)
- Waannu og nahay in wax alla wixii sharcigu yidhaahdo, uu ku leeyahay kuwa sharciga ku hoos jira, in af kasta la xidho, oo dunida oo dhammu ay Ilaah ku hor gar darnaato. Maxaa yeelay, shuqullada sharciga ninna xaq ku noqon maayo Ilaah hortiis, waayo, sharciga ayaa lagu gartaa dembiga. (Rooma 3:19-20)

- RABBIGA Ilaaheenna ah ayaa ina halligey... maxaa yeelay, RABBIGEENA waynu ku dembaabnay.” (Yeremyaah 8:14)
- Oo maxaannu ku hadalnaa? Ama sidee baannu ku eed baxnaa? Ilaah waa soo saaray dembigayagii annagoo ah addoommadaada. (Bilowgii 44:16)
- Naftaydu waxay sugtaa Ilaah oo keliya, Oo badbaadadayduna waxay ka timaadaa xaggiisa. (Sabuuradii 62:1)
- Waa inaad sharcigan ku akhridaan... inay maqlaan, oo ay bartaan, oo ay RABBIGA Ilaahiinna ah ka cabsadaan. (Sharciga Ku Noqoshadiisa 31:11-12)
- Oo RABBIGU waa nagu amray inaannu samayno qaynuunnadan oo dhan oo aannu wanaaggayaga aawadiis weligayo uga cabsanno RABBIGA Ilaahayaga ah, inuu nolosha noogu daayo siday maanta tahay. (Sharciga KuNoqoshadiisa 6:24)
- Waayo, sharcigu wuxuu leeyahay hooska waxyaalaha wanaagsan oo iman doona, laakiin ma leh suuradda waxyaalahaas qudheeda. Oo caabudayaasha marnaba kaamil kagama uu dhigi karo allabaryo sannad walba had iyo goor la bixiyo... Laakiin allabaryadaas waxaa sannad walba lagu xusuustaa dembiyo. Waayo, ma suurtoowdo in dibiyo iyo orgiyo dhiiggoodu dembiyo qaado. (Cibraaniyada 10:1,3-4)
- Sidaas daraaddeed sharcigu wuxuu ahaa edbiyeheenna inuu Masiixa inoo geeyo, inaynu xaq ku noqonno rumaysadka. (Galatiya 3:24)
- Sidaas darteed, walaalayaalow, garta in ninkan xaggiisa dembidhaafka laydinkaga wacdiyey; nin kasta oo isaga rumaystana xaq baa lagaga dhigay wax walba oo sharciga Muuse uusan xaq idinkaga dhigi karin. (Falimaha Rasuullada 13:38-39)

Qaynuunka nasashada sabsiyada waxaa loo bixiyey inuu calaamad u noqdo inay tahay inaynu ka “nasano” camalladeena oo aynu aamino shaqada Ilaahay.

- Sida runta ah waa inaad dhawrtaan ayaamahayga sabtiyaasha ah: waayo, waa calaamo ina dhex taal aniga iyo idinka ka ab ka ab; si aad u ogaataan inaan anigu ahay RABBIGA quduus idinka dhigaya... Mid kasta oo ka dhiga wax aan quduus ahayn hubaal waa in la dilaa, waayo, ku alla kii maalintaas shaqeeya, de qofkaas waa in laga gooyaa dadkiisa. (Baxniintii 31:13-14)
- Maalmaha sabtida, kuwaas oo ah hooska waxyaalaha iman doona, laakiinse jidhka waxaa iska leh Masiixa. (Kolosalay 2:16-17)
- Ciise ayaa hadalkan yidhi..."Ii kaalaya kulligiin kuwiinna hawshaysan oo culaabaysanow, oo anigu waan idin nasin doonaa." (Matayos 11:25,28)

Dadkii Axdigii Hore laguma badbaadin camalkoodii daraaddeed, laakiinse nimcada Ilaahay ku salaysan aaminaadda badbaadada Ilaahay.

- Kuwiinna qalbiga qallafsan oo xaqnimada ka fogow, bal i maqla! Xaqnimadaydii waan soo dhowaynayaa, oo iyana ma ay fogaan doonto, oo badbaadintayduna ma ay raagi doonto. (Ishacyaah 46:12-13)
- RABBIGU wuxuu leeyahay... "badbaadintaydu way soo dhow dahay inay timaado, oo xaqnimadayduna dhaqsay u soo muuqan doontaa." (Ishacyaah 56:1)
- Laakiinse anigu RABBIGAAAN dhawrayaa, oo Ilaaha badbaadadayda waan sugayaa. (Miikah 7:7)
- Laakiinse waan ogahay in kii i soo furtay nool yahay, Iyo inuu ugudambaysta dhulka ku istaagi doono. (Ayuub 19:25)
- Laakiinse anigu waxaan isku halleeyey naxariistaada, Oo qalbigayguna wuxuu ku rayrayn doonaa badbaadintaada. (Sabuurradii 13:5)
- Markaasaa Xannaah tukatay oo waxay tidhi, "Qalbigaygu Ilaah buu ku faraxsan yahay... Maxaa yeelay, waxaan ku reyreeyaa badbaadintaada. mid quduus ahu sida RABBIGA ma jiro, Waayo, adiga mooyee mid kale ma jiro, Oo dhagax weyn oo Ilaahayaga la mid ahuna ma jiro. (1 Samuu'eel 2:1-2)

- Oo waxaa maalintaas la odhan doonaa, “Bal eega, waa kan Ilaahayagu. Isagaannu sugaynay, wuuna na badbaadin doonaa. Kanu waa RABBIGA, isagaannu sugaynay, oo waxaannu ku farxi oo ku rayrayn doonaa badbaadintiisa.” (Ishacyaah 25:9)

Dhowr qof oo quruuntii Yuhuudda ka tirsanaa ayaa si sax ah u dhowrayey imaanshaha Ciise, sida Simecoon iyo Anna kuwaas oo arkay Ciise oo cunug yar ah.

- Simecoon... markaasuu gacmihiisa ku qaaday, oo Ilaah ammaanay, oo yidhi, “Rabbiyow, imminka addoonkaagu nabad ha ku tago, Sida hadalkaagu ahaa, waayo, indhahaygu waxay arkeen badbaadintaada.” (Luukos 2:25,28-30)
- Anna... Ilaah bay mahadnaqday, oo kuwa furashada sugayay oo dhan ayay xaggiisa kala hadashay. (Luukos 2:36,38)

12. Waxiyada iyo Sansaamaha

Waxiyadii Axdigii Hore waxay tusayeen inuu Ciise ahaa Wiilka, Ilaaha (Cimaanu’eel macnaheedu waa Ilaahay oo inala jooga) oo wuxuu Isagu tusay inuu dembiyadeena qaadi doono.

- Waayo, waxaa inoo dhashay ilmo, waxaa layna siiyey wiil, oo boqornimadu garbihiisay saarmi doontaa, oo magiciisana waxaa loo bixin doonaa Ka Yaabkaleh, iyo Lataliye, iyo Ilaaha Xoogga leh, iyo Aabbaha Daa’imka ah, iyo Amiirka Nabadda. (Ishacyaah 9:6)
- Bal ogaada, gabadh bikrad ah baa uuraysan doonta, oo waxay dhali doontaa wiil, oo magiciisana waxay u bixin doontaa Cimaanuu’eel. (Ishacyaah 7:14)
- Yaa samada u baxay, oo ka soo degay? Yaa dabaysha gacmihiisa ku soo ururshay? Yaa biyaha dharkiisa ku guntay? Yaa dhulka darafyadiisa oo dhan dhisay? Magicii, wiilkiisana magicii, haddaad taqaan? (Maahmaahyadii 30:4)
- Wiilka dhunkada, waaba intaasoo uu idiin cadhoodaa oo aad jidka ku baabba’daane. Waayo, cadhadiisu haddiiba

way kululaan doontaa. Waxaa barakaysan kuwa isaga isku halleeya oo dhan. (Sabuuradii 2:12)

- Laakiinse waxaa isaga loo dhaawacay xadgudubyadeenna, waxaana loo nabareeyey xumaatooyinkeenna, edbintii nabaadiinadeennana dushiisay ku dhacday, dildillaaciisiina waynu ku bogsannay. Dhammaanteen sidii ido baynu u hallownay, midkeen waluba jidkiisuu u leexday, oo RABBIGU wuxuu isaga dul saaray xumaanteenna oo dhan. (Ishacyaah 53:5-6)
- Wuxuu arki doonaa waxay naftiisu ku dhibtootay, wuuna u riyaaqi doonaa. Addoonkayga xaqa ahuna aqoontiisa ayuu kuwa badan xaq kaga dhigi doonaa, wuxuuna xambaari doonaa xumaatooyinkooda. (Ishacyaah 53:11)

Waa kuwan dhowr waxyi oo Ciise ku saabsan oo Axdigii Hore ku jira, iyo kuwaas oo dhowr boqol oo sanno kaddib uu Ciise kaamilay.

- Waxay arki doonaan Aniga oo ah kii ay wareemeen. (Sekaryaah 12:10)
- Laakiin mid askartii ka mid ah ayaa dhinaca Ciise waran kaga wareemay, oo markiiba waxaa ka soo baxay dhiig iyo biyo. (Yooxanaa 19:34)
- Laakiinse adigu Beytlaxam Efraataahay in kastoo aad ku yar tahay kumanyaalka reer Yahuudah, waxaa adiga iiga kaa soo bixi doona mid dalka Israa'iil taliye ka noqon doona, kaasoo bixitinkiisu ahaa waa hore, iyo tan iyo weligiis. (Miikaah 5:2)
- Ciise wuxuu dhashay Beytlaxamtii Yahuudiya. (Matayos 2:1)
- Bal eeg, boqorkaagu waa kuu imanayaa. Isagu waa xaq oo guul buu leeyahay, waana qalbi qabow yahay, oo wuxuu fuushan yahay dameer ah qayl dameereed. (Sekaryaah 9:9)
- Markaasay Ciise u keeneen, oo dharkoodii bay qaylkii dusha ka saareen, oo Ciise ayay fuusheen. Oo intuu socday, dharkoodii ayay jidka ku gogleen. (Luukos 19:35-36)

- Kuwii i karbaashay ayaan dhabarkaygii u duway, oo kuwii timaha iga rifayna dhabannadaydaan u duway. Wejigaygiina ceeb iyo candhuuf toona kama aan qarín. (Ishacyaah 50:6)
- Markaasay wejiga kaga candhuufeen oo garaaceen. Qaarna waa dharbaaxeen. (Matayos 26:67)

Dhacdooyin badan oo dhab ah ayaa hoosiis u sii ahaa Ciise. Waa kuwan dhowr ka mid ahi sida noloshii Yuusuf, oo Ciise lagu kaamilay.

- Markaasuu Yuusuf xaggooda war xun uga keenay aabbahood...kolkaasay... nebcaadeen isagii, wayna kari waayeen inay isaga si nabad ah ula hadlaan. (Bilowgii 37:2,4)
- Duniidu idinma nebcaan karto, anigase way i neceb tahay, waayo, waxaan ka marag furaa in shuqulladeedu ay shar yihiin. (Yooxanaa 7:7)
- Markaasay meel fog ka arkeen isagii... ayay ku tashadeen inay dilaan. (Bilowgii 37:18)
- Wadaaddadii sare iyo waayeelladii dadka oo dhan ayaa Ciise wax ka gees ah ka wada hadlay si ay u dilaan. (Matayos 27:1)
- Oo Ilaah wuxuu hortiin ii soo diray inuu...idin badbaadiyo oo kuwo fara badan baxsadaan. (Bilowgii 45:7)
- Innagu waynu aragnay oo waxaynu markhaati u furaynaa in Aabbuhu Wiilka soo diray si uu Badbaadiyaha dunida u noqdo. (1 Yooxanaa 4:14)
- Masriyiintii oo dhammu Yuusuf ayay u yimaadeen, oo waxay ku yidhaahdeen, “Cunto na sii, waayo, maxaannu hortaada ugu dhimanaynaa?” (Bilowgii 47:15)
- Markaasaa Ciise wuxuu ku yidhi, “Anigu waxaan ahay kibista nolosha.” (Yooxanaa 6:35)

13. Aadan iyo Xaawa

Aadan iyo Xaawa waxay isku dayeen inay qaawanaantoodii (ceebtii dembigooda) ku daboolaan camalladoodii (wixii ay sameeyeen). Ilaahay wuxuu tusay in la aqbali karo oo keliya waxa uu Isagu bixiyo.

- Oo labadoodiiba indhahoodii way furmeen, oo waxay garteen inay qaawan yihiin; waxayna isku tosheen caleemo berde, oo ay gunti ka samaysteen. (Bilowgii 3:7)
- RABBIGA Ilaah ahuna wuxuu Aadan iyo naagtiisii u sameeyey dhar harag ah, wuuna u xidhay iyagii. (Bilowgii 3:21)

Kuwani waa aayado kale oo tusaya sida ay khasaare u tahay inaynu isku dayno inaynu dembiga ku daboolo shaqooyinkeena ama “camalladeena wanwanaagsan.”

- Xuubabkoodu dhar uma ay noqon doonaan, oo shuqulladoodana innaba iskuma qar in doonaan. Shuqulladoodu waa shuqullo xumaaneed, oo falinta dulmiguna gacmahooday ku jirtaa. (Ishacyaah 59:6)
- Kii xadgudubyadiisa qariyaa ma liibaani doono, Laakiinse kii qirta oo haddana ka tagaa, naxariis buu heli doonaa. (Maahmaahyadii 28:13)

Haddii aynu dembiyadeena qirano innaga oo iska siibeyna dharkeena (camalladeena) wasakhda ah, oo Ciise isku hallayno, markaa waxaa la inoo gelinayaa khamiiskiisa xaqnimada.

- Waayo, kulligayo waxaannu noqonnay sida wax aan nadiif ahayn, oo xaqnimadayada oo dhammuna waa sida dhar wasakh ah, kulligayona waxaannu u engegnay sida caleen oo kale, oo xumaantayadiina sidii dabayl oo kale ayay noo kaxaysataa. (Ishacyaah 64:6)
- Intuu maradiisa iska tuuray ayuu booday oo Ciise u yimid. (Markos 10:50)
- Si weyn baan RABBIGA ugu rayrayn doonaa, oo naftayduna Ilaahayga bay ku farxi doontaa, waayo, wuxuu ii xidhay dharkii badbaadada, oo wuxuu i huwiyey khamiiskii xaqnimada. (Ishacyaah 61:10)

- RABBIGU wuxuu leeyahay, “Kanu waa dhaxalkii addoommada RABBIGA, oo xaqnimadooduna xaggaygay ka timid.” (Ishacyaah 54:17)

Dharka wasakhda ah ee gaboobey wuu jeexjeexmaa, oo Ilaahay hortiisa dembiga ku fashiliyaa. Xaqnimada Ciise oo keliya ayaa ah khamiiska waari kara.

- Xaqnimadaadu waa xaqnimo weligeed sii waaraysa, (Sabuurradii 119:142)
- Waayo, aboor baa sida dhar oo kale u cuni doona, oo dixiri baa sida dhogor oo kale u cuni doona, laakiinse xaqnimadaydu weligeedba way sii waari doontaa, oo badbaadintayduna tan iyo ab ka ab way sii jiri doontaa. (Ishacyaah 51:8)
- Waxaa barakaysan kii soo jeeda oo dharkiisa dhawra sii uusan qaawanaan ugu socon oo aan cawradiisa loo arag. (Muujintii 16:15)

Haddii aynu isku hallayno camalladeena, waxaynu u malayn karnaa inaynu badbaadney, laakiinse waxaynu ogaanaa inaynaan gashanayn khamiiska xaqnimda ee Ciise.

- Laakiin boqorkii kolkuu soo galay inuu martida eego, wuxuu meesha ku arkay nin aan dharkii arooska qabin, oo wuxuu ku yidhi, ‘Saaxiibow, sidee baad halkan u soo gashay adigoo aan dharkii arooska qabin?’ Wuuna iska aamusay. Markaasaa boqorkii wuxuu midiidinyadii ku yidhi, ‘Lugaha iyo gacmaha ka xidha, oo gudcurka dibadda ah ku tuura; halkaas waxaa jiri doonta baroor iyo ilko jirriqsi.’ (Matayos 22:11-13)

14. Qaabiil iyo Haabiil

Qaabiil wuxuu allabari ahaan u bixiyey midhihii shaqadiisa waana la diidey. Haabiil wuxuu allabari ahaan u bixiyey lax (oo calaamad u ah aaminaadda allabariga Ciise) oo taas waa la aqbalay.

- Haabiilna wuxuu ahaa adhijir, laakiin Qaabiil wuxuu ahaa beerfale... Qaabiil wuxuu qurbaan ahaan Rabbiga ugu keenay midhihii dhulka. Haabiilna wuxuu wax uga keenay

curadyadii adhigiisa... RABBIGUNA wuu eegay Haabiil iyo qurbaankiisii; laakiinse Qaabiil iyo qurbaankiisii Rabbigu ma uu eegin. Qaabiilna aad buu u cadhooday, wejigiisiina wuu madoobaaday. Oo RABBIGU wuxuu ku yidhi Qaabiil, “Maxaad u cadhoonaysaa? Maxaase wejigaagu u madoobaaday? Haddaad wax wanaagsan samaysid, sow laguma aqbaleen?” (Bilowgii 4:2-7)

Qaabiil wuxuu isku halleeyey kartidiisii (oo wuxuu doono ayuu sameeyey), dhulkuu falay, oo wuxuu allabari ahaan u bixiyey midhihii shaqadii gacmihiisa.

- U soo dhowaanta si aad wax u maqashid way ka roon tahay inaad bixisid allabariga nacasyada oo kale, maxaa yeelay, iyagu ma oga inay wax shar ah samaynayaan. (Wacdiyahii 5:1)
- Waxaad falateen sharnimo, waxaad soo goosateen xumaan, oo waxaad cunteen midhihii beenta, waayo, waxaad isku hallayseen jidkiinna iyo raggiinna tirada iyo xoogga badan. (Hoosheeca 10:13)
- Waxaa jirta waddo dadka la qumman, Laakiinse dhammaadkeedu waa jidadkii dhimashada. (Maahmaahyadii 16:25)
- Maalintii oo dhan waxaan gacmahayga u kala bixinayay dad caasi ah, oo jid aan wanaagsanayn ku socda, oo fikirradooda daba gala. (Ishacyaah 65:2)

Haddii aynu wanaag samayno (jidka Ilaahay raacno), markaa waa la ina aqbalayaa, oo la inagama habaarayo adduunka cusub (sidii Qaabiil loo habaaray oo kale).

- Oo haatan waad ku habaaran tahay dhulka. (Bilowgii 4:11)
- Markaasuu kuwa bidixdiisa jooga ku odhan doonaa, ‘Kuwa yahow inkaarano, iga taga oo gala dabka weligiis ah.’ (Matayos 25:41)
- Kan xaqa ah weligiis la dhaqaajin maayo, Laakiinse kuwa sharka lahu dhulka ma fadhiyi doonaan. (Maahmaahyadii 10:30)

15. Wax ka Barashada Baraska

Ilaahay wuxuu badanaa Baybalka inagu baray marxallado micne toos iyo kuwo dadban labadaba leh.

- Oo nebiyadana waxaan u soo dhiibay masaalooyin. (Hoosheeca 12:10)
- Laakiin kii addoontu xagga jidhkuu ka dhashay, naagta xorta ah keediise ballan buu ku dhashay, waxyaalahanu waa masaal. (Galatiya 4:23-24)

Aayadahan soo socda ee ku saabsan baraska qofka, khamiiska, ama gurigu, waxay kaloo ina barayaan sida ay dembi badnaanteenu cudur u tahay.

- Markaas wadaadku waa inuu meeshaas fiiriyaa, oo haddii nabarka muuqashadiisuna ay dubka sare hoos u sii dhaafsiisan tahay, waa baras kaasu... oo wadaadku waa inuu yidhaahdaa, Ninkanu waa nijaasaysan yahay... Isagu waa nijaasaysan yahay, oo waa inuu keligiis meel ku hoydaa, oo hoygiisuna waa inuu ahaadaa xerada dibaddeeda. (Laawiyiintii 13:25,46)
- Oo dharkii uu cudurka barasku ku yaal... waa in wadaadka la tusaa... Oo wadaadkuna waa inuu fiiriyaa cudurkaas... oo haddii cudurku dharka ku sii faafay... waxaasu waa nijaasaysan yahay. Oo isna waa inuu gubaa dharkaas cudurku ku jiro... Oo waa in dab lagu gubaa. (Laawiyiintii 13:47,49-52)
- Wadaadku waa inuu soo galaa, oo fiiriyaa, oo bal eeg, cudurku hadduu guriga ku faafay... markaas gurigu waa nijaasaysan yahay. Oo isagu waa inuu guriga dumiyaa kulli dhagxantiisa, iyo alwaaxdiisa, iyo malaastiisa oo dhanba, oo waa inuu magaalada dibaddeeda u bixiyaa, oo meel nijaas ah ku daadiyaa. (Laawiyiintii 14:44-45)

Mid kasta oo ka tirsan aayadahan aynu kor ku soo xiganey ee baraska ku saabsan, wadaadka ayaa si masaal ahaan ah u imtixaamaya, taas oo tusaale ka bixinaysa Wiilka Ilaahay, Ciise Masiix.

- Haddaba innagoo leh wadaad sare oo weyn, kan samooyinka sii dhex maray, kaas oo ah Ciisoo Wiilka Ilaah ah. (Cibraaniyada 4:14)
- Ciise Masiix oo xukumi doona kuwa nool iyo kuwii dhintayba hortiiisa, oo waxaan kaloo kugu amrayaa muuqashadiisa iyo boqortooyadiisa, (2 Timoteyos 4:1)
- Sidaasaannu u hadalnaa, mana aha inaannu dadka ka farxinno, laakiinse inaannu ka farxinno Ilaaha qalbigayaga imtixaama. (1 Tesaloniika 2:4)
- War miyey idiin wanaagsan tahay inuu idin baadho? Mase sida nin loo khiyaaneeyo ayaad Isaga u khiyaanaynaysaan?... War sow sarraysnaantiisu idin cabsiin mayso? Oo sow baqdintiisu idinku dhici mayso? (Ayuub 13:9,11)
- Oo wadaaddadiina waxay ugu jawaabeen oo ku yidhaahdeen, “Wuu nijaasoobayaa...”... RABBIGU wuxuu leeyahay, “Dadkanu waa saasoo kale, oo shuqul kasta oo ay gacmahooda ku qabtaanna waa saa” (Xaggay 2:13-14)

Digniin jacayl leh oo Ilaahay #1: Qofka baraska qaba waxaa laga dhigay nijaas, oo waxaa loo saaray inuu keligii magaalada dibaddeeda ku noolaado.

- Kii shar leh waxaa lagu afgembiyaa sharnimadiisa, Laakiinse kan xaqa ahu rajuu leeyahay markuu dhinto. (Maahmaahyadii 14:32)
- Waayo, taas waad taqaaniin in dhillay, ama qof wasakh ah, ama nin damac xun oo sanam caabudaa, uusan innaba dhaxal ku lahayn boqortooyada Masiix iyo Ilaah. 6 Ninnaba yuusan idinku khiyaanayn hadal aan micne lahayn; waayo, waxyaalahaas daraaddood ayaa cadhada Ilaah ugu soo degtaa carruurta caasinimada. (Efesos 5:5-6)
- Oo gudaheedana (Jannada) sinaba uma ay geli doonaan wax nijaas ah amase kii sameeya karaahiyo iyo been; laakiinse waxaa keliyadoo geli doona kuwa ku qoran kitaabka nolosha ee Wanka. (Muujintii 21:7)

Digniin jacayl leh oo Ilaahay #2: Dharka baraska leh waxaa laga dhigay mid nijaas ah oo dab baa lagu gubey.

- Dembilayaasha Siyoon dhex jooga way cabsanayaan, oo cibaadalaawayaashuna cabsi bay la gariirayaan, “bal keennee baa dabkan wax gubaya dhex joogi doona? Oo keennee baa gubasho weligeed ah dhex joogi doona?” (Ishacyaah 33:14)

Digniin jacayl leh oo Ilaahay #3: Guriga baraska leh waxaa laga dhigay nijaas oo la burburiyey.

- Halaag ha ku dhaco, waayo, way igu xadgudbeen! In kastoo aan iyaga soo furan lahaa haddana been bay iga sheegeen. Oo qalbigooda igama ay baryin. (Hoosheeca 7:13-14)
- Ilaahna sidaas oo kaluu kuu halligi doonaa weligaaba, Oo isna kor buu kuu qaadi doonaa, oo wuxuu kaa bixin doonaa teendhadaada, Oo wuxuu kaa saari doonaa kuwa nool dalkooda. (Sabuuradii 52:5)

Aayadahan Axdiga Cusub ku qorani waxay tusayaan cawaaqibada dabka, hallaaga, iyo ka dheeraynta Ilaahay hortiisa.

- Markii Rabbi Ciise samada ka muuqdo, isagoo wata malaa'igaha xooggiisa, oo dab ololaya ku jira, oo ka aargudanaya kuwa aan Ilaah aqoon iyo kuwa aan addeecin injiilka Rabbigeenna Ciise Masiix. Waxaa lagu ciqaabi doonaa halaag weligiis ah, oo waxaa laga gooyin doonaa Rabbiga hortiisa iyo ammaanta xooggiisa, markuu yimaado maalintaas in isaga lagu ammaano quduusiintiisa oo lagula yaabo kuwii rumaystay oo dhan, maxaa yeelay, markhaatifurkayagii aan idiin sheegnay waa la rumaystay. (2 Tesaloniika 1:7-10)

Maaddaama uu Ilaahay yahay meesha uu wanaag oo dhammi ka soo maaxdo, in lagaa dayriyo, ama dheereeyo Ilaahay hortiisa macnaheedu waa inaadan nabdoonayn.

- RABBIGU wuxuu leeyahay, “Kuwa sharka ah nabadu uma jirto.” (Ishacyaah 48:22)
- Fikirradoodu waa fikirro xumaaneed, baabba' iyo halligaad ayaa jidadkooda dhex yaal... Jidka nabadda ma yaqaaniin, oo socodkoodana caddaalad laguma arko.

Waxay samaysteen dhabbayaal qalqalloocan, oo ku alla kii maraaba nabad ma uu yaqaan. (Ishacyaah 59:7-8)

Innagu ma lihin rajo aynu isku daahirino, laakiinse Ciise ayaa inaga bogsiiin kara barasnimada dembi badnaanteena oo ina daahirin kara.

- Bal yaa odhan kara, “Qalbigayga waan nadiifiyey, Oo dembigayga waan ka daahirsanahay?” (Maahmaahyadii 20:9)
- Bal yaa wax wasakh ah wax nadiif ah ka soo bixin kara? Xataa mid qudha oo saas yeeli karaa ma jiro. (Ayuub 14:4)
- Markaasaa waxaa u yimid nin baras leh, wuuna jilba joogsaday oo baryay, oo ku yidhi, “Haddaad doonaysid waad i daahirin kartaa.” Kolkaasaa Ciise u naxariistay, oo intuu gacantiisa soo taagay, ayuu taabtay oo ku yidhi, “Waa doonayaa ee daahirsanow.” Kolkiiba baraskii waa ka baxay, oo wuu daahirsanaaday. (Markos 1:40-42)
- Laakiin haddaynu nuurka ku soconno siduu isaguba nuurka ugu jiro... dhiigga Ciise, oo Wiilkiisa ah, wuxuu inaga nadiifiyaa dembi oo dhan. (1 Yooxanaa 1:7)

Innagu ma lihin rajo aynu isku sixi karno, laakiinse Ciise ayaa inaga bogsiiin kara kharibnaanta dembi badnaanteena, oo Isaga ayaa ina sixi kara.

- Shuqullada qorraxda hoosteeda lagu sameeyo oo dhan waan arkay, oo bal eeg, dhammaantood waa wax aan waxba tarayn iyo dabagalka dabaysha oo kale. Wixii qalloocan lama toosin karo, oo wixii dhimmanna lama tirin karo. (Wacdiyahi 1:14-15)
- Oo bal eeg, waxaa joogtay naag siddeed iyo toban sannadood cudur qabtay, wayna isku soo jabnayd, mana ay kari karin inay istoosiso. Ciise goortuu arkay, ayuu u yeedhay oo ku yidhi, “haweentoy, cudurkaaga waad ka furan tahay.” Kolkaasuu gacmihiisa saaray, oo kolkiiba way toosnaatay, oo llaah bay ammaantay. (Luukos 13:11-13)
- RABBIYOW, i bogsii, oo anna waan bogsan doonaa, i badbaadi, oo anna waan badbaadi doonaa, waayo, adigu waxaad tahay ammaantaydii. (Yeremyaah 17:14)

Innagu ma haysano rajo aynu iskaga xorayno addoonsiga iyo gumeysiga dembiga, laakiinse Ciise ayaa xor inaga dhigi kara.

- Waayo, waxaannu nahay dad addoommo ah, laakiinse Ilaahayagu naguma dayrin addoonnimadayadii, illowse naxariis buu na siiyey. (Cesraa 9:9)
- Anigu waxaan ahay RABBIGA... waanan idinka xorayn doonaa addoonsigooda, waanan idinku furan doonaa gacan fidsan iyo xukummo waaweyn. (Baxniintii 6:6)
- Sidaas aawadeed haddii Wiilku idin xoreeyo, runtii xor baad ahaan doontaan. (Yooxanaa 8:6)
- Waayo, qaynuunka Ruuxa nolosha ee ku dhex jira Ciise Masiix ayaa iga xoreeyey qaynuunka dembiga iyo dhimashada. (Rooma 8:2)

Dabiiciyan, qalbiyadeenu waa khiyaano miidhan, laakiinse Ciise ayaa qalbi cusub ina siin kara.

- Waxaa jira farcan isla daahirsan, Oo weliba aan nijaastoodii ka maydhmin. (Maahmaahyadii 30:12)
- Ilaah ka cabsashadiisu indhihiisa ma hor taal. Waayo, wuu isfaaniyaa inaan dembigiisa la garan karin Oo aan la nebcaanayn. (Sabuuradii 36:1-2)
- Markaasuu wuxuu ku yidhi, "Idinku waxaad tihiin kuwa dadka hortooda isku soo caddeeya inaad xaq tihiin, laakiin Ilaah waa garanayaa qalbiyadiinna, waayo, wixii dadka dhexdooda lagu sarraysiiyaa, Ilaah hortiisa waa ka karaahiyo." (Luukos 16:15)
- Qalbiga dadku wax kasta buu ka khiyaano badan yahay, oo aad iyo aad buu u xun yahay, bal yaa garan kara? Aniga RABBIGA ah ayaa qalbiga baadha, anigaa kelyaha imtixaama, si aan nin kastaba ugu abaalmariyo sidii jidkiisu ahaa iyo sidii midhaha falimihiisu ahaayeen. (Yeremyaah 17:9-10)
- Waxaa barakaysan kii xadgudubkiisa la cafiyey, oo dembigiisa la daboolay. Waxaa barakaysan ninkii aanu RABBIGU dembi ku tirin, Oo ruuxiisa aanay khiyaano ku jirin. (Sabuuradii 32:1-2)
- Nin walba ugu abaalgud siday jidadkiisa oo dhammu yihiin, adoo qalbigiisa og, (maxaa yeelay, adigoo keliya ayaa garta waxa binu-aadmiga oo dhan qalbiyadooda ku jira). (2 Taariikhdii 6:30)

- Ilaahow, igu dhex abuur qalbi nadiif ah. (Sabuuradii 51:10)
- Waxaan idinka nadiifin doonaa wasakhdiinnii oo dhan iyo sanamyadiinnii oo dhanba. Oo weliba waxaan idin siin doonaa qalbi cusub, oo ruux cusubna waan idin gelin doonaa; jidhkiinnana qalbigii dhagaxa ahaa baan ka dhex bixin doonaa, oo waxaan idin siin doonaa qalbi jiidh ah. (Yexesqeel 36:25-26)

16. Labada Siyood ee uu Ilaahay Dadka u Arko

Ilaahay hortiisa ama sharowyo (kuwo naftooda isku halleeya), awliyo xaq ah (oo Ilaahay talo saarta) ayaynu nahay.

- Kuwiisa quduuska ah cagahooda isagaa dhawri doona, Laakiinse kuwa sharka leh waxaa lagu aamusiin doonaa gudcur dhexdiis; Waayo, ninna xoog kuma adkaan doono. (1 Samuu'eel 2:9)
- Waayo, kuwa sharka leh gacmahoodu way jebi doonaan, Laakiinse RABBIGU kuwa xaq ah wuu tiiriyaa. (Sabuuradii 37:17)
- Waayo, RABBIGU wuxuu gacantiisii quduuska ahayd bayaan ugu muujiyey quruumaha oo dhan hortooda, oo dhulka darafyadiisa oo dhammuna waxay wada arki doonaan badbaadinta Ilaaheenna. (Ishacyaah 52:10)
- Wuxuuna arkay inaan ninna la arag... sidaan daraaddeed gacantiisa ayaa isaga badbaado u keentay, oo xaqnimadiisii ayaa tiirisay. (Ishacyaah 59:16)
- Gacantaadaad dadkaagii ku soo furatay. (Sabuuradii 77:15)
- Xaqnimadaydii way soo dhowdahay, badbaadintaydiina way soo baxday... oo gacantayday isku hallayn doonaan. (Ishacyaah 51:15)

Maaddaama ay Ilaahay hortiisa laba nooc oo dad ah oo keliyahi jiraan, waxaa kaloo jira laba maxsuul oo keliya.

- Kuwanuna waxay geli doonaan taqsiirta weligeed ah, kuwa xaq ahuse waxay geli doonaan nolosha weligeed ah. (Matayos 25:46)

- Kuwa xaqa ah rajadoodu waa farxad, Laakiinse kuwa sharka leh filashadoodu way baabbi'i doontaa. RABBIGA jidkiisu waa u qalcad kuwa qumman; Laakiinse xumaanfalayaasha waa u baabba'. (Maahmaahyadii 10:28-29)
- Bal fiiri ninka kaamilka ah, oo bal eeg, kan qumman, Waayo, ninkaas ugu dambaystiisu waa nabad. Laakiinse kuwa xadgudbaa dhammaantood wadajir bay u baabbi'i doonaan, Oo kuwa sharka lahuna ugu dambaystoda way go'i doonaan. Kuwa xaqa ahse badbaadadoodu waa xagga RABBIGA, Oo wakhtiga dhibaataada isagu waa qalcaddooda. Oo RABBIGU iyaguu caawiyaa... wuuna badbaadiyaa, Maxaa yeelay, isagay magangaleen. (Sabuuradii 37:37-40)
- Kii xaq ah waxaa laga samatabbixiyaa dhibaato, Oo meeshiisana waxaa yimaada kii shar leh. (Maahmaahyadii 11:8)
- Wiilka Aadanaha ayaa malaa'igihisa diri doona, oo waxay boqortooyadiisa ka ururin doonaan wax kasta oo xumeeya iyo kuwa dembiga fala. Oo waxay ku tuuri doonaan foornada dabka, halkaas waxaa jiri doonta baroor iyo ilko jirriqsi. Markaasaa kuwa xaqa ah ku dhalaali doonaan boqortooyada Aabbahood sida qorraxdu u dhalaalayso. (Matayos 13:41-43)

Ilaahay dadka wuu jecel yahay, oo Isagu haba yaraatee kuma farxo inay dad naarta galaan kaddib marka badbaadadiisa diidaan.

- Haddaba Ciise ayaa u jawaabay oo ku yidhi... "Idinkuna dooni maysaan inaad ii timaadaan inaad nolol lahaataan. (Yooxanaa 5:19,40)
- Sayidka RABBIGA ahu wuxuu leeyahay, "Noloshaydaan ku dhaartaye inaan innaba farxad ka helayn dhimashada sharrowga, laakiinse waxaan jeclahay in sharrowgu uu jidkiisa ka soo noqdo oo uu noolaado." (Yexesqeel 33:11)
- Markaasaa xertiisii Yacquub iyo Yooxanaa goortay arkeen, waxay ku yidhaahdeen, "Sayidow, ma doonaysaa inaannu

dab amarno inuu cirka ka soo dego oo baabbi'yo?"
Isaguse waa ku jeestay oo canaantay iyaga, oo ku yidhi,
"Garan maysaan caynkii ruuxa aad ka tihiin. Wiilka
Aadanuhu uma imaan inuu dadka halaago laakiinse wuxuu
u yimid inuu iyaga badbaadiyo." (Luukos 9:54-56)

Dhammaanteen waxaynu ku dhalanay dabeecad shar leh,
laakiinse waxaynu noqon karnaa kuwo xaq ah (mar labaad
dhashay) marka aynu aamino xaqnimada Ciise.

- Kuwa sharka lahu waxay qalaad ku noqdaan uurkii hooyadood, Oo mar alla markii ay dhashaan ayay habaabaan iyagoo been sheegaya. (Sabuuradii 58:3)
- Bal eeg, aniga waxaa laygu qabanqaabiyey xumaan, Oo waxaa hooyaday igu uuraysatay dembi. (Sabuuradii 51:5)
- Ciise ayaa u jawaabay oo ku yidhi, "Runtii, runtii waxaan kugu leeyahay, Qof haddaanu mar kale dhalan, boqortooyadii Ilaah arki kari maayo." (Yooxanaa 3:3)
- Wuxuu isaga oo aan dembi aqoonin ka dhigay inuu dembi noqdo aawadeen, inaynu noqonno xaqnimada Ilaah ee ku jirta isaga. (2 Korintos 5:21)
- Laakiin haatan sharciga la'aantiis ayaa xaqnimadii Ilaah la muujiyey, waxaana u marag furay sharciga iyo nebiyadii, waxaana weeyaan xaqnimada Ilaah ee lagu helo rumaysadka xagga Ciise Masiix oo u ah in alla inta rumaysata oo dhan, waayo, kala duwanaa ma leh. (Rooma 3:21-22)

Waxaa kaloo jira laba "aabbe" oo keliya marka loo eego ka aad la jiro. Haddii aynu mar labaad dhalano markaa Ilaahay ayaa Aabbe inoo ah.

- Ciise wuxuu ku yidhi, "Haddii Ilaah aabbihii yahay, waad i jeclaan lahaydeen... Idinku waxaad tihiin kuwo aabbahood Ibiiska yahay, oo waxaad doonaysaan inaad samaysaan damacyada aabbihii... Markuu been ku hadlo, tiisuu ku hadlaa, waayo, waa beenaaleh, waana beenta aabbaheed. (Yooxanaa 8:42,44)
- Way iskharriseen, oo carruurtiisii iyagu ma aha, waa ceebtooda, iyagu waa qarni qalloocan oo maroorsan. (Sharciga KuNoqoshadiisa 32:5)

Waxaa kaloo jira laba nooc oo rumaysi ah oo keliya, inaynu camalladeena aamino ama rumaysano shaqada Ilaahay.

- RABBIGU wuxuu leeyahay, “Ninkii nin isku halleeya oo binu-aadmiga gacan ka dhigta, oo qalbigiisu RABBIGA ka tegey, waa inkaaray yahay. Waayo, wuxuu ahaan doonaa sida geed xun oo lamadegaanka ku yaal, oo mana uu arki doono markii wanaag imanayo.” (Yeremyaah 17:5-6)
- Waxaa barakaysan ninkii RABBIGA isku halleeya, oo rajadiisuna ay RABBIGA tahay. Waayo, wuxuu ahaan doonaa sida geed lagu beeray biyaha dhinacooda... oo kulaylku markuu yimaado kama cabsan doono. (Yeremyaah 17:7-8)
- Anigaa ah Ka baadhbaadha kelyaha iyo qalbiyada, oo Anna midkiin walbaba waxaan wax u siin doonaa sida shuqulladiinnu yihiin. (Muujintii2;23)
- Kan Wiilka haystaa, noloshuu leeyahay. Kii aan Wiilka Ilaah haysanna nolosha ma leh. (1 Yooxanaa 5:12)

17. Garowsashada Baahideena

Waa inaynu “xaraashnaa/ilownaa” wax kasta oo aynu haysano, innaga oo garowsanayna inaanay ahayn waxa aynu qabano, inaan wanaag inagu jirin, in Ciise oo keliyahi uu wanaagsan yahay.

- Xagga kan doonaya ma aha, xagga kan ordana ma aha, laakiinse waa xagga Ilaaha naxariista leh. (Rooma 9:16)
- Nin baa ku soo orday... oo weyddiiyey oo ku yidhi, “Macallin wanaagsanow, maxaan sameeyaa inaan nolosha weligeed ah dhaxlo? Ciise wuxuu ku yidhi, “Maxaad iigu yeedhaysaa, Wanaagsanow? Mid wanaagsan ma jiro mid maahee, kaasuna waa Ilaah. Qaynuunnada waad taqaan”... Wuxuu u jawaabay oo ku yidhi, “Macallimow, kuwaas oo dhan tan iyo yaraantaydii ayaan dhawrayay.” Markaasaa Ciise intuu eegay jeclaaday oo ku yidhi, “Wax keliya ayaa kuu dhiman. Tag oo iibi waxaad haysatid oo dhan...oo kaalay oo i soo raac.”... wuuna baxay isagoo calool xun, waayo, wuxuu ahaa mid waxyaalo badan leh. (Markos 10:17-22)

- Sidaa darteed midkiin walba oo aan ka tegin wuxuu leeyahay oo dhan, xer iima ahaan karo. (Luukos 14:33)

Ciise wuxuu isaga ku yidhi “Wax keliya ayaa kuu dhiman.” Waxa keliya ee muhiimka ahi waa inuu magaceenu ku qornaado Kitaabka Nololsha kaddib marka aynu Ciise rumayno.

- Oo markaasaan arkay carshi weyn oo cad, iyo kii ku fadhiyey, oo wejigiisa dhulkii iyo samadii ay ka carareen... Oo markaasaan arkay kuwii dhintay, yar iyo weynba, iyagoo taagan carshiga hortiisii, markaasaa waxaa la furay kitaabbadii; oo haddana waxaa la furay kitaab kale oo ah kii nololsha; oo kuwii dhintay waxaa lagu xukumay waxyaalihii kitaabbadii ku qornaa, sidii ay shuqulladoodii ahaayeen... Oo ku alla kii aan kitaabkii nololsha laga helin isagoo ku qoran, waxaa lagu tuuray badii dabka ahayd. (Muujintii 20:11-12,15)

Qaadashada iskutallaabta macnaheedu waa dhimashada isla weynaanteena iyo inaynu qirano oo aynaan ka xumaan wax wanaag ahi inagu jirin.

- Oo wuxuu ku yidhi, “Mid uun hadduu doonayo inuu iga daba yimaado, ha dayriyo doonistiisa, iskutallaabtiisana ha soo qaato oo ha i soo raaco.” (Markos 8:34)
- Laakiin, walaalayaalow, haddii aan anigu weli gudniinta wax ku wacdiyo, maxaa weli la ii silciyaa? Haddaba xumaan-u-qaadashada iskutallaabtu waa dhammaatay. (Galatiya 5:11)
- RABBIGA abbiga ciidammada... Wuxuu ahaan doonaa meel quduus ah, laakiinse wuxuu kaloo noqon doonaa dhagax lagu turunturoodo iyo sallax lagu xumaado. (Ishacyaah 8:13-14)
- Waxaa barakaysan kan aan iga xumaanin. (Matayos 11:6)

Badbaadada Ilaahay qof kasta ayaa heli kara, laakiinse waxayn taas heli karnaa oo keliya haddii aynu baahideena garowsano oo aynu Isaga rumaysano.

- Oo isaguna wuxuu dembiyadeenna u yahay kafaaraggudka; oo kuweenna oo keliya uma aha ee weliba wuxuu u yahay dembiyada dunida oo dhan. (1 Yooxanaa 2:2)

- Waayo, nimcadii Ilaah way muuqatay, iyadoo badbaado u keenaysa dadka oo dhan. (Tiitos 2:11)
- Waxaannu rajo ku leennahay Ilaaha nool oo Badbaadiyaha u ah dadka oo dhan, khusuusan kuwa rumaysan. (1 Timoteyos 4:10)

Haddii aynu garowsano baahida weyn ee aynu qabno dembiileyaah ahaan oo aynu Ciise rumayno, markaa badbaadadiisa ayaynu helaynaa.

- Waayo, isagu wuxuu samatabbixin doonaa kan baahan markuu qayliyo, Iyo miskiinka aan mid caawiya lahayn. Wuxuu u nixi doonaa miskiinka iyo kan baahan, Oo kuwa baahan naftoodana wuu badbaadin doonaa. (Sabuuradii 72:12-13)
- Hadalkanu waa run, waana mid istaahila in la wada aqballo, in Ciise Masiix dunida u yimid inuu badbaadiyo dembilayaasha anoo ah kan ugu daran. Laakiin sababtaas daraaddeed waa la ii naxariistay in, anigoo ah kan ugu daran, Ciise Masiix iga muujiyo dulqaadashadiisa oo dhan, inaan masaal u noqdo kuwa hadda dabadeed isaga rumaysan doona inay nolol weligeed ah helaan. (1 Timoteyos 15-16)
- Oo rumaysadla'aantiis ma suurtowdo in isaga laga farxiyo, taas aawadeed kan Ilaah u yimaadaa waa inuu rumaysto inuu jiro oo uu yahay kan u abalguda kuwa isaga doondoona. (Cibraaniyada 11:6)
- Rabbi baa Rabbi u wada ah, waana u taajir in alla intii barida isaga. Waayo, “ku alla kii magaca RABBIGA ku baryaa, waa badbaadi doonaa.” (Rooma 10:12-13)

Haddii aynu garowsano inaynu cudur dembi la yidhaahdo qabno oo Ciise rumaysano, markaa Isaga ayaa ina bogsiinaya oo ma dhimanayno.

- Laakiin goortuu Ciise taas maqlay, wuxuu yidhi, “Kuwa ladan dhakhtar uma baahna, laakiin kuwa buka ayaa u baahan. Laakiin taga oo barta hadalkan micnihiisa, Waxaan doonayaa naxariis ee ma aha allabari, waayo uma aan imanin inaan kuwa xaqa ah u yeedho, laakiin

inaan dembilayaasha u yeedho ayaan u imid.” (Matayos 9:12-13)

- Anigu waxaan idhi, “RABBIYOW, ii naxariiso, Oo naftayda bogsii, waayo, waan kugu dembaabay.” (Sabuuradii 41:4)

Haddii aynu garowsano inaynu xaqnimada ka aradanahay oo aynu xaqnimada Ilaahay u gaajoono, markaa farxad iyo qosol baynu jannada ku lahaan doonaa.

- Waxaa barakaysan kuwa xaqnimada u gaajaysan oo u harraadsan, waayo, way dhergi doonaan. (Matayos 5:6)
- Markaasuu ku yidhi, “Waxaa barakaysan kuwiinna masaakiinta ah, waayo, boqortooyadii Ilaah idinkaa leh. Waxaana barakaysan kuwiinna haddeer gaajaysan, waayo, waad dhergi doontaan. Waxaana barakaysan kuwiinna haddeer ooyaya, waayo, waad qosli doontaan.” (Luukos 6:20-21)
- I dhegaysta, walaalahayga aan jeclahayow. Miyaan Ilaah u dooran kuwa ah masaakiinta xagga dunida inay ahaadaan kuwa hodan ku ah rumaysadka oo dhaxla boqortooyaduu u ballanqaaday kuwa isaga jecel? (Yacquub 2:5)
- Maryanna waxay tidhi, “Naftaydu Rabbigay weynaynaysaa, Ruuxayguna wuxuu ku reyreeyey Ilaaha Badbaadiyahayga ah... Waayo, kan xoogga leh ayaa waxyaalo waaweyn ii sameeyey... Kuwii gaajaysnaa ayuu wax wanaagsan ka dhergiyey, Kuwii hodanka ahaana iyagoo madhan ayuu diray.” (Luukos 1:46-47,49,53)
- Ninkan miskiinka ahu wuu qayshaday, oo Rabbiguna wuu maqlay, Oo wuxuu ka badbaadshay dhibaatooyinkiisii oo dhan. (Sabuuradii 34:6)
- Way gaajoodeen, wayna harraadeen, Oo naftoodiina way ku dhex taag darnaatay. Markaasay RABBIGA u qayshadeen iyagoo dhibban, Oo isna wuu ka samatabbixiyey dhibaatooyinkoodii. Oo weliba wuxuu iyagii ku hoggaamiyey jid toosan... Dadku muu RABBIGA ha ku ammaano wanaaggiisa, Iyo shuqulladiisa yaabka badan oo uu binu-aadmiga u sameeyo! Isagu wuxuu dhergiyaa nafta aad wax u doonaysa, Oo nafta gaajaysanna wuxuu ka dhergiyaa wanaagga. (Sabuuradii 107:5-9)

- Ilaahow, wanaaggaaga aawadiis wax baad u diyaarisay masaakiinta. (Sabuuradii 68:10)

Laakiinse haddii aynu isku hallayno “wanaaggeena,” markaa waxaynu aakhirka garowsan doonaa inuu dhab ahaantii “wanaaggeenu” bilaa qiime yahay.

- Hoog waxaa leh kuwiinna hodanka ah, waayo, gargaarkiinna waad hesheen. Hoogna waxaa leh kuwiinna haddeer dheregsan, waayo, waad gaajoon doontaan; hoogna waxaa leh kuwiinna haddeer qoslaya, waayo, waad barooran doontaan oo ooyi doontaan. (Luukos 6:24-25)
- Kii maalkiisa isku halleeyaa wuu dhici doonaa, Laakiinse kii xaq ahu wuxuu u barwaaqoobi doonaa sida caleen cagaar ah. (Maahmaahyadii 11:28)
- Waa kan ninkii aan Ilaah xooggiisa ka dhiganu, Laakiinse wuxuu isku halleeyey hodantinimadiisa badan, Oo wuxuu ku xoogaystay xumaatadiisii. (Sabuuradii 52:7)
- Waayo, waxaad isku hallaysay shuqulladaada iyo khasnadahaaga, oo sidaas daraaddeed adigana waa lagu qabsan doonaa. (Yeremyaah 48:7)
- Bal kaalaya hadda, kuwiinnan taajiriinta ahow, ooya oo ka baroorta dhibaatooyinka idinku soo degaya. Duunyadiinnii way qudhuntay, dharkiinniina aboor baa cunay. (Yacquub 5:1-2)
- Waxaa jira nin hodan iska dhiga laakiinse aan waxba haysan, Oo waxaa jira mid miskiin iska dhiga laakiinse maal badan leh. (Maahmaahyadii 13:7)

18. Badbaadada Ilaahay waa u Diyaar Dadka oo Dhan

Badbaadada Ilaahay waxaa heli kara qof kasta si kasta oo uu hore dembiile ugu ahaa, waana doonista Ilaahay inaynu dhammaanteen badbaadno.

- Waayo, anigu injiilka ka xishoon maayo, maxaa yeelay, waa u xoogga Ilaah xagga badbaadinta ku alla kii

rumaysta... Waayo, dhexdiisa waxaa laga muujiyaa xaqnimada Ilaah. (Rooma 1:16-17)

- Ku alla kii magaca RABBIGA ku barya wuu samatabbixi doonaa. (Yoo'eel 2:32)
- Kuwa isaga isku halleeya, midkoodna lama eedayn doono. (Sabuurradii 34:22)
- Waayo, Sayidow, waad wanaagsan tahay, oo waxaad diyaar u tahay inaad dembidhaafto, Waanad u naxariis badan tahay kuwa ku barya oo dhan. (Sabuurradii 86:5)
- Laakiinse anigu Ilaah baan baryi doonaa, Oo RABBIGAA i badbaadin doona. (Sabuurradii 55:16)
- Oo kii harraadsanuna ha yimaado. Oo kii doonayaaba biyaha nolosha hadiyad ahaan ha u qaato. (Muujintii 22:17)
- Rabbigu kama raago inuu ballankiisa oofiyo sida dadka qaarkiis ku tiriyo inay tahay raagid, laakiinse idinkuu idiin dulqaadanayaa, oo dooni maayo in qofnaba halligmo, laakiinse wuxuu doonayaa in kulli la wada toobadkeeno. (2 Butros 3:9)
- Taasu way wanaagsan tahay, waana mid Ilaaha Badbaadiyeheenna ahu aqbali karo. Wuxuu doonayaa in dadka oo dhammu badbaado oo ay runta gartaan. (1 Timoteyos 2:3-4)

Runtu waa inuu dembi oo dhan Ilaahay hortiisa xaaraan ka yahay, laakiinse Isagu wuu ina saamaxayaa marka aynu u toobadkeeno. Dembiga keliya ee uusan Ilaahay saamixi karin waa ka geeska ah ama ku xadka-gudba Ruuxa Quduuska ah, oo ah Ilaahay oo beenaale loogu yeedho marka aynu nolosheena oo dhan adeeci weyno, amarkiisa ah inaynu Ciise rumayno.

- Runtii waxaan idinku leeyahay, Bini-aadmiga waa loo cafiyi doonaa dembiyadii oo dhan iyo caydii ay ku caytamaan; laakiin ku alla kii caaya Ruuxa Quduuska ah, weligiis cafiga heli maayo, laakiin wuxuu eed u leeyahay dembi weligiis ah. (Markos 3: 28-29)
- Weli way sii dembaabeen, Oo mana ay rumaysan shuqulladiisii yaabka badnaa. (Sabuurradii 78:32)

- Sida amarka Ilaaha daa'imka ah oo quruumaha oo dhan loo ogeysiiyey inay addeecaan rumaysadka. (Rooma 16:26)
- Oo kanu waa qaynuunkiisa, kaasoo ah inaynu rumaysanno magaca Wiilkiisa Ciise Masiix ah. (1 Yooxanaa 3:23)
- Toobadkeena oo injiilka rumaysta. (Markos 1:15)
- Kii aan Ilaah rumaysanna, wuxuu isaga ka dhigay beenaaleh; maxaa yeelay, wuxuusan rumaysan maraggii uu Ilaah ka marag furay Wiilkiisa. Maragguna waa kan, kaas oo ah in Ilaah ina siiyey nolosha weligeed ah, oo ay noloshanu Wiilkiisa ku jirto. (1 Yooxanaa 5:10-11)
- Haddaynu dembiyadeenna qiranno, isagu waa aamin iyo caaddil inuu dembiyadeenna inaga cafiyo, oo uu inaga nadiifiyo xaqdarrada oo dhan. Haddaynu nidhaahno, Ma aynu dembaabin, waxaynu Ilaah ka dhignaa beenaaleh, oo ereygiisa inaguma jiro. (1 Yooxanaa 1:9-10)
- Kii Wiilka rumaystaa, wuxuu leeyahay nolosha weligeed ah, kii aan Wiilka rumaysanse, nolosha ma arki doono, laakiin cadhadii Ilaah ayaa ku taal isaga. (Yooxanaa 3:36)

Dembiyadeena oo aynu ka xumaano, qirano, ama isku dayno inaynu soo gudno innaga inama badbaadinayso.

- Markaas Yuudas, oo ahaa kii gacangeliyey, goortuu arkay in la xukumay, ayuu isqoomameeyey, oo soddonkii gogo' oo lacagta ahaa ayuu wadaaddadii sare iyo waayeelladii ku celiyey, oo wuxuu ku yidhi, "Waan dembaabay markaan gacangeliyey dhiig eed la'." ...Markaasuu lacagtii macbudka gudhiisa ku daadshay oo ka tegey, wuuna baxay oo isdeldelay. (Matayos 27:3-5)
- Maxaa yeelay, caloolxumaanta ah sida Ilaah doonayo waxay keentaa toobadda xagga badbaadada ee aan laga qoomamayn, laakiin caloolxumaanta dunidu waxay keentaa dhimasho. (2 Korintos 7:10)

Toobadkeenida dhabta ah macnaheedu waa dembiyadeena oo aynu garowsano oo aynu u soo jeesano jidka Ilaaha ee rumaynta (aaminaada) Ciise Masiix.

- Sayidka RABBIGA ahu wuxuu leeyahay, “Anigu miyaan innaba sharrowga dhimashadiisa ku farxaa? Sowse kama aan jecli inuu jidkiisa ka soo noqdo oo uu noolaado?” (Yexesqeel 18:23)
- Haddaba haatan waxaa RABBIGU leeyahay, “Qalbigiinna oo dhan iigu soo jeesta.” (Yoo’eel 2:12)
- Jidkaaga RABBIGA ku aamin, Isagana isku hallee, wuuna samaynayaaye. (Sabuuradii 37:5)
- Markaasuu garashadooda u furay si ay u gartaan Qorniinka. Wuxuuna ku yidhi, “Sidaasay u qoran tahay, Waa inuu Masiixu silco, oo uu maalinta saddexaad kuwa dhintay ka soo sara kaco, iyo in toobaddii iyo dembidhaafka magiciisa lagu wacdiyo quruumaha oo dhan.” (Luukos 24:45-47)

Warka wanaagsani waa sahlan yahay: Innagu iskeen sina uma shaqaysan karno ugumana qalmi karno badbaado, oo Ilaahay Laftiisa ayaa jacaylkiisa daraaddiis, badbaado buuxda inoo diyaariyey, wanaaggiisa iyo shaqadiisa daraaddood. Si aynu u badbaadno waxaynu u baahannahay inaynu **G**arowsano dembi badnaanteena, oo **R**umayno inuu **C**iise dembiyadeena u dhintay oo haddana soo sarakacay, oo aynu **I**saga **C**uskano innaga oo weydiisanayna inuu ina siiyo badbaadadiisa gebi ahaanba bilaashka ah.

- Ilaahow, iigu naxariiso sida raxmaddaadu tahay, **O**o xadgudubyadaydana igaga tirtir sida naxariistaada badnaanteedu tahay. Xumaantayda iga wada maydh, **O**o iga nadiifi dembigayga. Waayo, anigu waan ogahay xadgudubyadayda, **O**o dembigayguna hortayduu yaallaa had iyo goorba. (Sabuuradii 51:1-3)
- Markaasuu dibadda u soo saaray, oo ku yidhi, “Sayidyadow, maxaa igu waajib ah inaan yeelo inaan ku badbaado?” Kolkaasay ku yidhaahdeen, “Rumayso Rabbi Ciise, waadna badbaadi doontaa.” (Falimaha Rasuullada 16:30-31)
- Haddaad afka ka qiratid in Ciise yahay Rabbiga, oo aad qalbiga ka rumaysatid in Ilaah isaga ka sara kiciyey kuwii dhintay, waad badbaadi doontaa. (Rooma 10:9)

- Haddaba idinka oo shar leh haddaad garanaysaan inaad hadiyado wanaagsan carruurtiinna siisaan, intee ka badan ayaa Aabbihiinna jannada ku jiraa wax wanaagsan uu siin doonaa kuwa isaga weyddiista? (Matayos 7:11)

Haddii aynu rumaysi dhab ah la nimaadno, markaa waxaynu xor ka nahay eed iyo ceeb. Sababtaa daraaddeed ayaynu farxad weyn u haysanaa!

- Waayo, xumaantooda waan cafiyi doonaa, oo dembigoodana kol dambe ma xusuusan doono. (Yeremyaah 31:34)
- Sida barigu uga fog yahay galbeedka, Sidaas oo kaluu xadgudubkeennii inooga fogeeyey. (Sabuuradii 103:12)
- Ku alla kii rumaysta isaga, ceeboobi maayo. (Rooma 10:11)
- Sidaas daraaddeed, kuwa Ciise Masiix ku dhex jiraa, haatan xukun ma laha. (Rooma 8:1)
- Isaga ma aydin arkin, waadse jeceshihiin, hadda in kastoo aydnaan arkin, waadse rumaysan tihiiin, oo waxaad ku faraxdaan farxad aan la sheegi karin oo ammaan leh. Waxaadna helaysaan waxa rumaysadkiinnu ku dhammaado oo ah badbaadada naftiinna. (1 Butros 1:8-9)

Maaddaama ay awood oo dhammi Ilaahay u sugnaatay oo uu wax kasta og yahay, waa qaali inaynu wakhti siino barashada waxa uu eraygiisa inagu barayo. Barashada erayga Ilaahay waxay inaga caawinaysaa inaynu Isaga si fiican u naqaano, oo rumaysigeena ku korno, oo aynu iska ilaalino waxbarashooyinka bidcinimada ah.

- Waxaan eraygaaga ugu reyreeyaa Sidii mid booli badan helay. (Sabuuradii 119:162)
- Oo erayadii afkiisana waxaan u hayay wax ka qiimo badan cuntada aanan ka maamin. (Ayuub 23:12)
- Ciise baa u jawaabay oo ku yidhi, “Sidaa darteed miyaydnaan qaldamin? Waayo, Qorniinka iyo xoogga Ilaah midna garan maysaan.” (Markos 12:24)
- Tallaabooyinkayga ku toosi eraygaaga, Oo dembina yaanu ii talin. (Sabuuradii 119:133)

- Oo sida carruur dhallaan ah u jeclaada caanaha ruuxa ee saafiga ah, si aad ugu kortaan xagga badbaadada. (1 Butros 2:2)

Meesha ugu fiican ee Baybalka lagu fasiri karaa waa isla Baybalka. Sidoo kale, Ilaaha Ruuxa Quduuska ah, oo muumin kasta dhex deggan, ayaa si toos ah inuu bari kara macnaha eraygiisa.

- Laakiin Gargaaraha Ruuxa Quduuska ah oo Aabbuhu ku soo diri doono magacayga, wax kasta ayuu idin bari doonaa, wuxuuna idin xusuusin doonaa wax kasta oo aan idinku idhi. (Yooxanaa 14:26)
- Subkidda aad ka hesheen isaga way idinku sii jirtaa; oo uma baahnidin in cidina wax idin barto; laakiin sida subkiddiisu wax walba idiin barto, oo ay run u tahay, beenna aanay u ahayn, waa inaad siday wax idiin bartay ugu sii jirtaan. (1 Yooxanaa 2:27)
- Laakiin haddii midkiin xigmad u baahan yahay, ha ka baryo Ilaah, kan kulli si deeqsinimo ah u siiya isagoo aan canaan, oo waa la siin doonaaye. (Yacquub 1:5)
- Waayo, caqligaas Ilaahiisaa ku tacliimiya, oo isaga bara. (Ishacyaah 28:26)

Waxaa aayadaha laga soo xigtey turjumaadda Baybalka ee af Soomaaliga ah ee ay Kenya Bible Society daabacday 2008 kaddib dalab ka yimid Society for International Missions (SIM).

Buuggan bilaash ah ayaa lagu qaybin karaa, ha ahaado isaga oo qoran ama isaga oo internet-ka laga ku jira e, laakiinse wax lagama beddeli karo, lamana iibin karo.

Buuggan waa laga soo dejisan karaa internet-ka ama waxaa laga akhriyi karaa bogga wonderfulsalvation.com